

思益梵天所問經

姚秦三藏法師鳩摩羅什譯



南無本師釋迦牟尼佛

說明

本繁體校正版《思益梵天所問經》電子書，根據《乾隆大藏經》大乘五大部外重譯經，第 0186 部，姚秦三藏法師鳩摩羅什譯《思益梵天所問經》原藏影印本校正，句讀僅供參考。

本電子書是免費結緣品，特此說明。

仁慧草堂

二〇二〇年八月



掃碼關注仁慧草堂微信公眾號

目 录

起誦儀.....	- 1 -
香讚.....	- 1 -
淨口業真言.....	- 1 -
淨三業真言.....	- 1 -
安土地真言.....	- 1 -
普供養真言.....	- 2 -
開經偈.....	- 2 -
思益梵天所問經卷第一.....	- 3 -
如來光明品第一.....	- 3 -
四法品第二.....	- 12 -
菩薩正問品第三.....	- 17 -
四諦品第四.....	- 30 -
叹功德品第五.....	- 32 -
思益梵天所問經卷第二.....	- 38 -
如來五力說品第六.....	- 38 -
如來大悲品第七.....	- 43 -
幻化品第八.....	- 46 -
菩薩光明品第九.....	- 53 -
菩薩受記品第十.....	- 61 -
薩婆若品第十一.....	- 67 -
思益梵天所問經卷第三.....	- 72 -
菩薩無二品第十二.....	- 72 -
名字義品第十三.....	- 79 -
論寂品第十四.....	- 83 -
如來二事品第十五.....	- 89 -
得聖道品第十六.....	- 97 -
志大乘品第十七.....	- 100 -
發菩提心品第十八.....	- 109 -
思益梵天所問經卷第四.....	- 118 -
師子吼品第十九.....	- 118 -

梵行牢強精進品第二十.....	- 121 -
海喻品第二十一.....	- 125 -
建立法品第二十二.....	- 133 -
如來神呪品第二十三.....	- 137 -
囑累品第二十四.....	- 144 -
結誦儀.....	- 147 -
補闕真言.....	- 147 -
補闕圓滿真言.....	- 147 -
普回向真言.....	- 147 -
禮佛發願文.....	- 148 -
迴向偈.....	- 149 -
三皈依.....	- 150 -

●起誦儀

香讚

(一徧)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三徧)

唵. 修唎. 修唎. 摩訶修唎. 修修唎. 薩婆訶.

淨三業真言

(三徧)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三徧)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三徧)

唵. 誝誝曩. 三婆嚩. 鞞日囉斛.

南無本師釋迦牟尼佛 (合掌三稱)

開經偈

(一徧)

無上甚深微妙法 百千萬劫難遭遇
我今見聞得受持 願解如來真實義

思益梵天所問經卷第一

姚秦三藏法師鳩摩羅什譯¹

如來光明品第一²

如是我聞：

一時，佛在³王舍城迦蘭陀竹林，與大比丘僧六萬四千人俱。菩薩摩訶薩七萬二千人，皆眾所知識，得陀羅尼無礙辯才及諸三昧，於諸神通無所罣礙，善能曉了諸法實性，悉皆逮得無生法忍。其名曰：文殊師利法王子、寶手法王子、寶積法王子、寶印手法王子、寶德法王子、虛空藏法王子、發心轉法輪法王子、網明法王子、障諸煩惱法王子、能捨一切法⁴王子、德藏法王子、華嚴法王子、師子法王子、月光法王子、尊意法王子、善莊嚴法王子。

及跋陀羅婆⁵等十六賢士：跋陀婆羅菩薩、寶積菩薩、星德菩薩、帝天菩薩、水天菩薩、善力菩薩、大意菩薩、殊勝意菩薩、增意菩薩、善

¹ 麗本：姚秦龜茲國三藏鳩摩羅什譯

² 麗本：序品第一

³ 麗本：住；永樂北藏本及龍藏本：在

⁴ 麗本：法法；永樂北藏本及龍藏本：法

⁵ 麗本：婆羅；永樂北藏本及龍藏本：羅婆

發意菩薩、不虛見菩薩、不休息菩薩、不少意菩薩、導師菩薩、日藏菩薩、持地菩薩，如是等菩薩摩訶薩七萬二千人。

及四天王釋提桓因等，忉利諸天、夜摩天、兜率陀天、化樂天、他化自在天，及梵王等諸梵天；并餘無量諸天、龍、鬼神、夜叉、乾⁶闥婆、阿修羅、迦樓羅、緊那羅、摩睺羅伽，人與非人普皆來集。

爾時世尊，大眾恭敬圍遶，而為說法。於是⁷網明菩薩即從坐起，偏袒右肩，右膝著地，頭面禮佛足，合掌向佛，動此三千大千世界引導起發一切大眾，而白佛言：「世尊！我欲從佛少有所問，若佛聽者乃敢諮請。」

佛告網明：「恣汝所問，當為解說悅可爾心。」

於是網明既蒙聽許，心大歡喜，即白佛言：「世尊！如來身相超百千萬日月光明；我自惟念：『若有眾生能見佛身，甚為希有！』我復惟念：『若有眾生能見佛身，皆是如來威神之力！』」

佛告網明：「如是，如是！如汝所言，若佛不加威神，眾生無有能見佛身，亦無能問。網明

⁶ 麗本：犍；永樂北藏本及龍藏本：乾

⁷ 麗本：時；永樂北藏本及龍藏本：是

當知！如來有光，名寂莊嚴，若有眾生遇斯光者，能見佛身不壞眼根；又如來光名無畏辯，若有眾生遇斯光者，能問如來其辯無盡；又如來光名集諸善根，若有眾生遇斯光者，能問如來轉輪聖王行業因緣；又如來光名淨莊嚴，若有眾生遇斯光者，能問如來天帝釋行業因緣；又如來光名得自在，若有眾生遇斯光者，能問如來梵天王行業因緣；又如來光名離煩惱，若有眾生遇斯光者，能問如來聲聞乘所行之道；又如來光名善遠離，若有眾生遇斯光者，能問如來辟支佛所行之道；又如來光名益一切智，若有眾生遇斯光者，能問如來大乘佛事；又如來光名曰⁸往益，佛來去時足下光明，眾生遇者命終生天；又如來光名一切莊⁹飾之具莊嚴其城，城中寶藏從地涌¹⁰出；又如來光名曰震動，佛以此光能動無量無邊世界；又如來光名曰生樂，佛以此光能滅地獄眾生苦惱；又如來光名曰上慈，佛以此光能令畜生不相惱害；又如來光名曰涼樂，佛以此光能滅餓鬼饑渴熱惱；又如來光名曰明淨，佛以此光使盲者得視；又如

⁸ 麗本：為；永樂北藏本及龍藏本：曰

⁹ 麗本：嚴；永樂北藏本及龍藏本：莊

¹⁰ 麗本：踊；永樂北藏本及龍藏本：涌

來光名曰聰聽，佛以此光能令眾生聾者得聽；又如來光名曰慚愧，佛以此光能令眾生狂者得正；又如來光名曰止息，佛以此光能令眾生捨十不善道，安住十善道；又如來光名曰離惡，佛以此光能令邪見眾生皆得正見；又如來光名曰能捨，佛以此光能破眾生慳貪之心，令行布施；又如來光名無惱熱，佛以此光能令毀禁眾生皆得持戒；又如來光名曰安利，佛以此光能令瞋恨眾生皆行忍辱；又如來光名曰勤修，佛以此光能令懈怠眾生皆行精進；又如來光名曰一心，佛以此光能令妄念眾生皆得禪定；又如來光名曰能解，佛以此光能令愚癡眾生皆得智慧；又如來光名曰清淨，佛以此光能令不信眾生皆得淨信；又如來光名曰能持，佛以此光能令少聞眾生皆得多聞；又如來光名曰威儀，佛以此光能令無慚眾生皆得慚愧；又如來光名曰安隱，佛以此光能令多欲眾生斷除婬欲；又如來光名曰歡喜，佛以此光能令多怒眾生斷除瞋恚；又如來光名曰照明，佛以此光能令多癡眾生斷除愚癡；又如來光名曰遍行，佛以此光能令等分眾生斷除等分；又如來光名示一切色，佛以此光能令眾生皆見佛身無量種色。網明當知！如來若以一劫、若減一劫，說此光明力用名號不

可窮盡。」

爾時，網明菩薩白佛言：「未曾有也。世尊！如來身者即是無量¹¹光明之藏，說法方便亦不可思議。世尊！我自昔來未曾聞此光明名號。如我解佛所說義，若有菩薩聞斯光明名號，信心清淨，皆得如是光明之身。世尊！唯¹²願今日放請菩薩光，令他方菩薩善能問難者見斯光已，發心來此娑婆世界。」

爾時，世尊受網明菩薩請已，即放光明照此三千大千世界，普及十方無量佛土。於是諸方無量百千萬億菩薩見斯光已，皆來至此娑婆世界。

時¹³，東方過七十二恒河沙佛土，有國名清淨，佛號日月光如來、應¹⁴、正遍知，今現在其佛土。有菩薩梵天，名曰思益，住不退轉。見此光已，到日月光佛所，頭面作禮，白佛言：「世尊！我欲詣娑婆世界釋迦牟尼佛所，奉觀¹⁵供養，親近諮受；彼佛亦復欲見我等。」其佛告言：「便往。梵天，今正是時！彼娑婆國有若干千億諸菩薩集，汝應以¹⁶十法遊於彼土。何等為十？於毀

¹¹ 麗本：無量無邊；永樂北藏本及龍藏本：無量

¹² 麗本：惟；永樂北藏本及龍藏本：唯

¹³ 麗本：爾時；永樂北藏本及龍藏本：時

¹⁴ 麗本：應供；永樂北藏本及龍藏本：應

¹⁵ 麗本：見；永樂北藏本及龍藏本：觀

¹⁶ 麗本：以此；永樂北藏本及龍藏本：以

於譽，心無增減；聞善聞惡，心無分別；於諸愚智，等以悲心；於上、中、下眾生之類，意常平等；於輕毀供養，心無有二；於他闕失，莫¹⁷見其過；見種種乘，皆是一乘；聞三惡道，亦勿驚畏；於諸菩薩，生如來想；佛出五濁世¹⁸，生希有想。梵天，汝當以此十法遊彼世界。」

思益梵天白佛言：「世尊！我不敢於如來前作師子吼，我所能行佛自知之。今當以此十法遊彼世界，一心修行。」

爾時，日月光佛國有諸菩薩白佛¹⁹言：「世尊！我得大利，不生如是惡眾生中。」其佛告言：「善男子，勿作是語！所以者何？若菩薩於此國中百千萬²⁰劫淨修梵行，不如彼土從旦至食無瞋礙心，其福為勝。」

時²¹有萬二千菩薩與思益梵天俱共發來，而作是言：「我等亦欲以此十法遊彼世界，見釋迦牟尼佛。」於是思益梵天與萬二千菩薩俱於彼佛土忽然不現，譬如壯士屈伸臂頃，到娑婆世界釋迦牟尼佛所，却住一面。

¹⁷ 麗本：不；永樂北藏本及龍藏本：莫

¹⁸ 麗本：濁；永樂北藏本及龍藏本：濁世

¹⁹ 麗本：其佛；永樂北藏本及龍藏本：佛

²⁰ 麗本：億；永樂北藏本及龍藏本：萬

²¹ 麗本：即時；永樂北藏本及龍藏本：時

爾時，佛告網明菩薩：「汝見是思益梵天不？」

「唯然！已見。」

「網明當知！思益梵天於諸正問菩薩中為最第一，於諸善分別諸法菩薩中為最第一，於諸說隨宜經意菩薩中為最第一，於諸慈心菩薩中為最第一，於諸悲心菩薩中為最第一，於諸喜心菩薩中為最第一，於諸捨心菩薩中為最第一，於諸軟語菩薩中為最第一，於諸不瞋癡²²菩薩中為最第一，於諸先意問訊菩薩中為最第一，於諸決疑菩薩中為最第一。」

爾時，思益梵天與萬二千菩薩俱，頭面禮佛足，右遶三匝，合掌向佛，以偈讚曰：

世尊大名稱	普聞於十方
所在諸如來	無不稱歎者
有諸餘淨國	無三惡道名
捨如是妙土	慈悲故生此
佛智無減少	與諸如來等
以大悲 ²³ 本願	處斯穢惡土
若人於淨國	持戒滿一劫
此土須臾間	行慈為最勝

²² 麗本：礙；永樂北藏本及龍藏本：癡

²³ 麗本：慈；永樂北藏本及龍藏本：悲

若人於此土 起身口意罪
應墮三惡道 現世受得除
生此土菩薩 不應懷憂怖
設有惡道罪 頭痛即得除
此土諸菩薩 若能守護法
世世所生處 不失於正念
若人欲斷縛 滅煩惱業罪
於此土護法 增益一切智
淨土多億劫 受持法解說²⁴
於此娑婆界 從旦至食勝
我見喜樂國 及見安樂土
此中無苦惱 亦無苦惱名
於彼作功德 未足以為奇
於此煩惱處 能忍不可事
亦教他此法 其福為最勝
我禮無上尊 大悲救苦者
能為惡眾生 說法甚為²⁵難
佛集無量眾 十方世界中
名聞諸菩薩 聽法無厭足
佛集十方界 名聞諸菩薩

²⁴ 麗本：脫；永樂北藏本及龍藏本：說

²⁵ 麗本：為甚；永樂北藏本及龍藏本：甚為

聽法無厭足 如海吞眾流
為如是人等²⁶ 廣說於佛道
釋梵四天王 諸天龍神等
皆集欲求法 隨所信樂說
比丘比丘尼 及清信士女
是四眾普集 願時為演說
有樂佛乘者 及緣覺聲聞
佛知其深心 悉皆為斷疑
不斷佛種者 能出生三寶
為是諸菩薩 我今請法王
名稱普流布 十方菩薩聞
皆悉共來集 為說無上道
此無上大法 二乘所不及
我等信力故 得入如是法
不可思議慧 非我等所及
佛雖無疲倦 我今²⁷有所請
悔過於世尊 願說菩薩²⁸道

²⁶ 麗本：等人；永樂北藏本及龍藏本：人等

²⁷ 麗本：而我；永樂北藏本及龍藏本：我今

²⁸ 麗本：提；永樂北藏本及龍藏本：薩

四法品第二

爾時思益梵天說此偈已，白佛言：「世尊！何謂菩薩其心堅固而無疲倦？何謂菩薩所言決定而不中悔？何謂菩薩增長善根？何謂菩薩無所恐懼威儀不轉²⁹？何謂菩薩成就白法？何謂菩薩善知從一地至一地？何謂菩薩於眾生中善知方便？何謂菩薩善化眾生？何謂菩薩世世不失菩提之心？何謂菩薩能一其心而無雜行？何謂菩薩善求法寶？何謂菩薩善出毀禁之罪？何謂菩薩善障煩惱？何謂菩薩善入諸大眾？何謂菩薩善開法施？何謂菩薩得先因力不失善根？何謂菩薩不由他教而能自行六波羅蜜？何謂菩薩能轉捨禪定還生欲界？何謂菩薩於諸佛法得不退轉？何謂菩薩不斷佛種？」

爾時，世尊讚思益梵天：「善哉！善哉！能問如來如此之事。汝今諦聽，善思念之！」

「唯然，世尊！願樂欲聞。」

佛告思益梵天：「菩薩有四法，堅固其心而不疲倦。何等為四³⁰？一者，於諸眾生起大悲心；

²⁹ 麗本：動；永樂北藏本及龍藏本：轉

³⁰ 麗本：四；永樂北藏本及龍藏本：為四

二者，精進不懈；三者，信解生死如夢；四者，正思惟³¹佛之智慧。菩薩有此四法，堅固其心而不疲倦。

「梵天，菩薩有四法，所言決定而不中悔。何等為四³²？一者，決定說諸法無我；二者，決定說諸生處無可樂者；三者，決定常讚大乘；四者，決定說罪福業不失。是為四。

「梵天，菩薩有四法增長善根。何等為四？一者，持戒；二者，多聞；三者，布施；四者，出家。是為四。

「梵天，菩薩有四法，無所恐畏威儀不轉。何等為四³³？一者，失利；二者，惡名；三者，毀辱；四者，苦惱。是為四。

「梵天，菩薩有四法，成就白法。何等為四³⁴？一者，教人令信罪福；二者，布施不求果報；三者，守護正法；四者，以智慧教諸菩薩。是為四。

「梵天，菩薩有四法，善知從一地至一地。何等為四³⁵？一者，久植³⁶善根；二者，離諸過咎；

³¹ 麗本：量；永樂北藏本及龍藏本：惟

³² 麗本：四；永樂北藏本及龍藏本：為四

³³ 麗本：四；永樂北藏本及龍藏本：為四

³⁴ 麗本：四；永樂北藏本及龍藏本：為四

³⁵ 麗本：四；永樂北藏本及龍藏本：為四

³⁶ 麗本：殖；永樂北藏本及龍藏本：植

三者，善知方便迴向；四者，勤行精進。是為四。

「梵天，菩薩有四法，於眾生中善知³⁷方便。何等為四³⁸？一者，順眾生意；二者，於他功德起隨喜心；三者，悔過除罪；四者，勸請諸佛。是為四。

「梵天，菩薩有四法善化眾生。何等為四³⁹？一者，常求利益⁴⁰眾生；二者，自捨己樂；三者，心和忍辱；四者，除捨憍慢。是為四。

「梵天，菩薩有四法，世世不失菩提之心。何等為四⁴¹？一者，常憶念佛；二者，所作功德常為菩提；三者，親近善知識；四者，稱揚大乘。是為四。

「梵天，菩薩有四法，能一其心而無雜行。何等為四⁴²？一者，離聲聞心；二者，離辟支佛心；三者，求法無厭；四者，如所聞法廣為人說。是為四。

「梵天，菩薩有四法，善求法寶。何等為四⁴³？一者，於法中生寶想，以難得故；二者，於

³⁷ 麗本：善知；永樂北藏本及龍藏本：於眾生中善知

³⁸ 麗本：四；永樂北藏本及龍藏本：為四

³⁹ 麗本：四；永樂北藏本及龍藏本：為四

⁴⁰ 麗本：安；永樂北藏本及龍藏本：益

⁴¹ 麗本：四；永樂北藏本及龍藏本：為四

⁴² 麗本：四；永樂北藏本及龍藏本：為四

⁴³ 麗本：四；永樂北藏本及龍藏本：為四

法中生藥想，療眾病故；三者，於法中生財利想，以不失故；四者，於法中生滅苦想⁴⁴，至涅槃故。是為四。

「梵天，菩薩有四法，善出毀禁之罪。何等為四⁴⁵？一者，得無生法忍，以諸法無來故；二者，得無滅法忍⁴⁶，以諸法無去故；三者，得因緣忍，知諸法因緣生故；四者，得無住忍，無異心相續故。是為四。

「梵天，菩薩有四法，善障煩惱。何等為四⁴⁷？一者，正憶念；二者，障諸根；三者，得善法力；四者，獨處遠離。是為四。

「梵天，菩薩有四法，善入諸大眾。何等為四⁴⁸？一者，求法不求勝；二者，恭敬心無憍慢；三者，唯⁴⁹求法利，不自顯現；四者，教人善法，不求名利。是為四。

「梵天，菩薩有四法，善開法施。何等為四⁵⁰？一者，守護於法；二者，自益智慧亦益他人；三者，行善人法；四者，示人垢淨。是為四。

⁴⁴ 麗本：一切苦想；永樂北藏本及龍藏本：苦想

⁴⁵ 麗本：四；永樂北藏本及龍藏本：為四

⁴⁶ 麗本：忍；永樂北藏本及龍藏本：法忍

⁴⁷ 麗本：四；永樂北藏本及龍藏本：為四

⁴⁸ 麗本：四；永樂北藏本及龍藏本：為四

⁴⁹ 麗本：惟；永樂北藏本及龍藏本：唯

⁵⁰ 麗本：四；永樂北藏本及龍藏本：為四

「梵天，菩薩有四法得先因力不失善根，何等為四⁵¹？一者，見他人闕不以為過；二者，於瞋怒人常修慈心；三者，常說諸法因緣；四者，常念菩提。是為四。

「梵天，菩薩有四法，不由他教而能自行六波羅蜜。何等為四⁵²？一者，以施導人；二者，不說他人毀禁之罪；三者，善知攝法教化眾生；四者，解達深法。是為四。

「梵天，菩薩有四法，能轉捨禪定，還生欲界。何等為四⁵³？一者，其心柔軟；二者，得諸善根⁵⁴力；三者，不捨一切眾生；四者，善修智慧方便之力。是為四。

「梵天，菩薩有四法，於諸佛法得不退轉。何等為四⁵⁵？一者，受無量生死；二者，供養無量諸佛；三者，修行無量慈心；四者，信解無量佛慧。是為四。

「梵天，菩薩有四法，不斷佛種。何等為四⁵⁶？一者，不退本願；二者，言必施行；三者，大欲精進；四者，深心行於佛道。是為菩薩有此

⁵¹ 麗本：四；永樂北藏本及龍藏本：為四

⁵² 麗本：四；永樂北藏本及龍藏本：為四

⁵³ 麗本：四；永樂北藏本及龍藏本：為四

⁵⁴ 麗本：根；永樂北藏本及龍藏本：善根

⁵⁵ 麗本：四；永樂北藏本及龍藏本：為四

⁵⁶ 麗本：四；永樂北藏本及龍藏本：為四

⁵⁷四法不斷佛種。」

說是諸四法時，二萬二千天子⁵⁸及人皆發阿耨多羅三藐三菩提心；五千人得無生法忍。十方諸來菩薩供養於佛，所散天華周遍三千大千世界，積至于膝。

菩薩正問品第三⁵⁹

爾時，網明菩薩問思益梵天言：「佛說：『汝於正問菩薩中為最第一。』何謂菩薩所問為正問耶？」

梵天言：「網明，若菩薩以彼、我問，名為邪問；分別法問，名為邪問。若無彼、我問，名為正問；不分別法問，名為正問。

「又，網明，以生故問，名為邪問；以滅故問，名為邪問；以住故問，名為邪問。若不以生故問、不以滅故問、不以住故問，名為正問。

「又，網明，若菩薩為垢故問，名為邪問；為淨故問，名為邪問；為生死故問，名為邪問；為出生死故問，名為邪問；為涅槃故問，名為邪問。若不為垢、淨故問，不為生死、出生死故問，

⁵⁷ 麗本：有；永樂北藏本及龍藏本：有此

⁵⁸ 麗本：天；永樂北藏本及龍藏本：天子

⁵⁹ 麗本：分別品第三（丹本菩薩正問品第三）；永樂北藏本及龍藏本：菩薩正問品第三

不為涅槃故問，名為正問。所以者何？法位中無垢、無淨、無生死⁶⁰、無涅槃。

「又，網明，若菩薩為見故問、為斷故問、為證故問、為修故問、為得故問、為果故問，名為邪問。若無見、無斷、無證、無修、無得、無果故問，名為正問。

「又，網明，是善、是不善故問⁶¹，名為邪問；是世間法、是出世間法，是罪法、是無罪法，是有漏法、是無漏法，是有為法、是無為法，如是等二法，隨有⁶²所依而問者，名為邪問。若不見二、不見不二問，名為正問。

「又，網明，若菩薩分別佛問，名為邪問；分別法、分別僧、分別眾生、分別佛國、分別諸乘問，名為邪問。若於法不作一、異問者，名為正問。

「又，網明，一切法正，一切法邪。」

網明言：「梵天，何謂一切法正？一切法邪？」

梵天言：「於諸法性無心故，一切法名為正；若於無心法中，以心分別觀者，一切法名為邪。一切法離相名為正；若不信解是⁶³離相，是即分

⁶⁰ 麗本：無死；永樂北藏本及龍藏本：死

⁶¹ 麗本：善；永樂北藏本及龍藏本：善故問

⁶² 麗本：隨；永樂北藏本及龍藏本：隨有

⁶³ 麗本：達是；永樂北藏本及龍藏本：是

別諸法。若分別諸法，則入增上慢，隨所分別，皆名為邪。」

網明言：「何謂為諸法正性？」

梵天言：「諸法離自性、離欲際，是名正性。」

網明言：「少有能解如是正性者⁶⁴。」

梵天言：「是正性不一不多。網明，若⁶⁵善男子、善女人能如是知諸法正性，若已知、若今知、若當知，是人無有法已得、無有法今得、無有法當得。所以者何？佛說無得、無分別，名為所作已辦相；若人聞是諸法正性，勤行精進，是名如說修行，不從一地至一地。若不從一地至一地，是人不在生死、不在涅槃。所以者何？諸佛不得生死、不得涅槃。」

網明言：「佛不為度生死故說法耶？」

梵天言：「佛所示法有度生死耶？」

網明言：「無也。」

梵天言：「以是因緣當知佛不令眾生出生死、入涅槃，但為度妄想分別生死、涅槃二相者耳！此中實無度生死至涅槃者。所以者何？諸法平等，無有往來、無出生死、無入涅槃。」

⁶⁴ 麗本：性；永樂北藏本及龍藏本：性者

⁶⁵ 麗本：若有；永樂北藏本及龍藏本：若

爾時，世尊讚思益梵天言：「善哉！善哉！說諸法正性，應如汝所說。」說是法時，二千比丘不受諸法，漏盡，心得解脫。

佛告梵天：「我不得生死，不得涅槃。如來雖說生死，實無有人往來生死；雖說涅槃，實無有人得滅度者。若有入此法門⁶⁶，是人非生死相、非滅度相。」

爾時，會中五百比丘從坐而起，作是言：「我等空修梵行，今實見有滅度者，而言無有滅度。我等何用修道求智慧為？」

爾時，網明菩薩白佛言：「世尊！若有於法生見，則於其人，佛不出世。世尊！若有決定見涅槃者，是人不得生死。所以者何？涅槃名為除滅諸相，遠離一切動念戲論。世尊！是諸比丘於佛正法出家，而今隨⁶⁷於外道邪見，見涅槃決定相，譬如從麻出油、從酪出酥。世尊！若人於諸法滅相中求涅槃者，我說是輩皆為增上慢人。世尊！正行道者，於法不作生、不作滅，無得無果。」

網明謂梵天言：「是五百比丘從坐起者，汝當為作方便，引導其心入此法門，令得信解離諸

⁶⁶ 麗本：法門者；永樂北藏本及龍藏本：法門

⁶⁷ 麗本：墮；永樂北藏本及龍藏本：隨

邪見！」

梵天言：「善男子，縱使令去至恒河沙劫，不能得出如此法門。譬如癡人畏於虛空，捨空而走，在所至處不離虛空；此諸比丘亦復如是，雖復遠去，不出空相、不出無相相、不出無作相。又如一人求索虛空，東西馳走言：『我欲得空，我欲得空。』是人但說虛空名字而不得空，於空中行而不見空。此諸比丘亦復如是，欲求涅槃，行涅槃中而不得涅槃。所以者何？涅槃者但有名字。猶如虛空但有名字，不可得取；涅槃亦復如是，但有名字而不可得。」

爾時，五百比丘聞說是法，不受諸法，漏盡，心得解脫，得阿羅漢道，作是言：「世尊！若人於諸法畢竟滅相中求涅槃者，則於其人佛不出世。世尊！我等今者非凡夫、非學、非無學、不在生死、不在涅槃。所以者何？佛出世故，名為遠離一切動念戲論。」

爾時，長老舍利弗謂諸比丘：「汝今得正智，為己利耶？」

五百比丘言：「長老舍利弗！我等今者得諸煩惱，不可作而作。」

舍利弗言：「何故說此？」

諸比丘言：「知諸煩惱實相，故言得諸煩惱；涅槃是無作性，我等已證，故說不可作而作。」

舍利弗言：「善哉！善哉！汝等今者住於福田，能消供養。」

諸比丘言：「大師！世尊尚不能消諸供養，何況我等？」

舍利弗言：「何故說此？」

諸比丘言：「世尊知見法性，性常淨故。」

於是思益梵天白佛言：「世尊！誰應受供養？」

佛告梵天：「不為世法之所牽者。」

「世尊！誰能消供養？」

佛言：「於法無所取者。」

「世尊！誰為世間福田？」

佛言：「不壞菩提性者。」

「世尊！誰為眾生善知識？」

佛言：「於一切眾生不捨慈心者。」

「世尊！誰知報佛恩？」

佛言：「不斷佛種者。」

「世尊！誰能供養佛？」

佛言：「能通達無生際者。」

「世尊！誰能親近於⁶⁸佛？」

佛言：「乃至失命因緣不毀禁者。」

「世尊！誰能恭敬於佛？」

佛言：「善覆六根者。」

「世尊！誰名財富？」

佛言：「成就七財者。」

「世尊！誰名知足？」

佛言：「得出世間智慧者。」

「世尊！誰為遠離？」

佛言：「於三界中無所願者。」

「世尊！誰為具足？」

佛言：「能斷一切諸結使者。」

「世尊！誰為樂人？」

佛言：「無貪著者。」

「世尊！誰無貪著？」

佛言：「知見五陰者。」

「世尊！誰度欲河？」

佛言：「能捨六入者。」

「世尊！誰住彼岸？」

佛言：「能知諸道平等者。」

「世尊！何謂菩薩能為施主？」

⁶⁸ 麗本：近；永樂北藏本及龍藏本：近於

佛言：「菩薩能教眾生一切智心。」

「世尊！何謂菩薩能奉禁戒？」

佛言：「常能不捨菩提之心。」

「世尊！何謂菩薩能行忍辱？」

佛言：「見心相念念滅。」

「世尊！何謂菩薩能行精進？」

佛言：「求心不⁶⁹得。」

「世尊！何謂菩薩能行禪定？」

佛言：「除⁷⁰身心麤相。」

「世尊！何謂菩薩能行智慧？」

佛言：「於一切法無有戲論。」

「世尊！何謂菩薩能行慈心？」

佛言：「不生眾生想。」

「世尊！何謂菩薩能行悲心？」

佛言：「不生法想。」

「世尊！何謂菩薩能行喜心？」

佛言：「不生我想。」

「世尊！何謂菩薩能行捨心？」

佛言：「不生彼我想。」

「世尊！何謂菩薩安住於信？」

⁶⁹ 麗本：不可；永樂北藏本及龍藏本：不

⁷⁰ 麗本：能除；永樂北藏本及龍藏本：除

佛言：「信解心淨無濁法⁷¹。」

「世尊！何謂菩薩安住於空？」

佛言：「不著一切語言。」

「世尊！何謂菩薩名為有慚？」

佛言：「知見內法。」

「世尊！何謂菩薩名為有愧？」

佛言：「捨於外法。」

「世尊！何謂名為菩薩遍行？」

佛言：「能淨身口意業。」

爾時，世尊而說偈言：

若身淨無惡	口淨常實語
心淨常行慈	是菩薩遍行
行慈無貪著	觀不淨無恚
行捨而不癡	是菩薩遍行
若在空中聚野 ⁷²	及與處大眾
威儀終不轉 ⁷³	是菩薩遍行
知法名為佛	知離名為法
知無名為僧	是菩薩遍行
知多欲所行	知恚癡所行
善知轉此行	是菩薩遍行

⁷¹ 麗本：無濁法；永樂北藏本及龍藏本：心淨無濁法

⁷² 麗本：若聚若空野；永樂北藏本及龍藏本：若在空中聚野

⁷³ 麗本：缺；永樂北藏本及龍藏本：轉

不依止欲界 不住色無色
行如是禪定 是菩薩遍行
信解諸法空 及無相無作
而不盡諸漏 是菩薩遍行
善知聲聞乘 及辟支佛乘
通達於佛乘 是菩薩遍行
明解於諸法 不疑道非道
憎愛心無異 是菩薩遍行
於過去未來 及與現在世
一切無分別 是菩薩遍行⁷⁴

爾時，思益梵天白佛言：「世尊！何謂菩薩過世間法？通達世間法？通達世間法已，度眾生？於世間法行於世間，不⁷⁵壞世間？」

爾時，世尊以偈答言：

說五陰是世 世間所依止
依止於五陰 不脫世間法
菩薩有智慧 知世間實相
所謂五陰如 世間法不染
利衰及毀譽 稱譏與苦樂
如此之八法 常牽於世間

⁷⁴ 麗本：行（此下丹本為菩薩出過世間品第四）；永樂北藏本及龍藏本：行

⁷⁵ 麗本：而不；永樂北藏本及龍藏本：不

大智慧菩薩 散滅世間法
見世壞敗相 處之而不動
得利心不高 失利心不下
其心堅不動 譬如須彌山
利衰及毀譽 稱譏與苦樂
於此世八法 其心常平等
知世間虛妄 皆從顛倒起
如是之人等 不行世間道
世間所有道 菩薩皆識知
故能於世間 度眾生苦惱
雖行於世間 如蓮華不染
亦不壞世間 通達法性故
世間行世間 不知是世間
菩薩行世間 明了世間相
世間虛空相 虛空亦無相
菩薩知如是 不染於世間
如所知世間 隨知而演說
知世間性故 亦不壞世間
五陰無自性 是即世間性
若人不知是 常住於世間
若見知五陰 無生亦無滅

是人行世間⁷⁶ 而不依世間
凡夫不知法 於世起諍訟
是實是不實 住是二相中
我常不與世 起於諍訟事
世間之實相 悉以⁷⁷了知故
諸佛所說法 皆悉無諍訟
知世平等故 非實非虛妄
若佛法決定 有實有虛妄
是即為貪著 與外道無異
而今⁷⁸實義中 無實無虛妄
是故我常說 出世法無二
若人知世間 如是之實性
於實於虛妄 不取此惡見
如是知世間 清淨如虛空
是大名稱人 照世間如日
若人見世間 如我之所見
如斯之人等 能見十方佛
諸法從緣生 自無有定性
若知此因緣 則達法實相
若知法實相 是則知空相

⁷⁶ 麗本：現行世；永樂北藏本及龍藏本：行世間

⁷⁷ 麗本：已；永樂北藏本及龍藏本：以

⁷⁸ 麗本：今；永樂北藏本及龍藏本：令；校勘：今

若能知空相 則為見導師
若有人得聞 如是世間相
雖行於世間 而不住世間
依止諸見人 不能及此事
云何行世間 而不⁷⁹住世間
若佛滅度後 有樂是法者
佛則於其人 常現於法身
若人解達此 則守護我法
亦為供養我 亦是世導師
若人須與聞 世間性如此
是人終不為 惡魔所得便
若能達此義 則為大智慧
法財之施主 亦是具禁戒
若知世如此 忍辱力勇健
具足諸禪定 通達於智慧
所在聞是法 其方則有佛
如是諸菩薩 不久坐道場
若有深愛樂 如是世間⁸⁰性
則能降眾魔 疾得無上道

⁷⁹ 麗本：依；永樂北藏本及龍藏本：住

⁸⁰ 麗本：法；永樂北藏本及龍藏本：性

四諦品第四⁸¹

佛復告思益梵天：「如來出過世間，亦說世間苦、世間集、世間滅、世間滅道。五陰⁸²名為世間⁸³，貪著五陰名為世間集，五陰盡名為世間滅，以無二法求五陰名為世間滅道。又，梵天，所言五陰但有言說，於中取相分別生見，而說是名世間⁸⁴；不捨是見是名世間集；是見自相是名世間滅；隨以何道不取是見是名世間滅道。梵天，以是因緣故，我為外道仙人說言：『仙人，於汝身中即說世間苦、世間集、世間滅、世間滅道。』」

爾時，思益梵天白佛言：「世尊！所說四聖諦，何等是真聖諦？」

「梵天，苦不名為聖諦，苦集不名為聖諦，苦滅不名為聖諦，苦滅道不名為聖諦。所以者何？若苦是聖諦者，一切牛、驢畜生等，皆應有苦聖諦。若集是聖諦者，一切在所生處眾生，皆應有集聖諦。所以者何？以集故生諸趣中。若苦滅是聖諦者，觀滅者、說斷滅者，皆應有滅聖諦。若

⁸¹ 麗本：解諸法品第四（此品名丹本無下二十四幅爾時下方為歎功德品第五）；永樂北藏本及龍藏本：四諦品第四

⁸² 麗本：梵天，五陰；永樂北藏本及龍藏本：五陰

⁸³ 麗本：世間苦；永樂北藏本及龍藏本：世間

⁸⁴ 麗本：世間苦；永樂北藏本及龍藏本：世間

道是聖諦者，緣一切有為道者皆應有道聖諦。梵天，以是因緣故，當知聖諦非苦、非集、非滅、非道。聖諦者，知苦無生是名苦聖諦；知集無和合是名集聖諦；於畢竟滅法中，知無生無滅是名滅聖諦；於一切法平等，以不二法得道是名道聖諦。

「梵天，真聖諦者無有虛妄。虛妄者，所謂：著我、著眾生、著人、著壽命者、著養育者、著有著無、著生著滅、著生死、著涅槃。梵天，若行者言：『我知見苦。』是虛妄；『我斷集。』是虛妄；『我滅證⁸⁵。』是虛妄；『我修道。』是虛妄。所以者何？是人遺⁸⁶失佛所護念，是故說為虛妄。何等是佛所護念？謂不憶念一切諸法，是名佛所護念⁸⁷。若行者住是念中，則不住一切相；若不住一切相，則住實際；若住實際，是名不住心；若不住心，是人名為非實語⁸⁸、非妄語者。梵天，是故當知，若非實、非虛妄者，是名聖諦。梵天，實者終不作不實，若有佛、若無佛，法性常住，所謂生死性、涅槃性是性常實⁸⁹。所以者

⁸⁵ 麗本：證滅；永樂北藏本及龍藏本：滅證

⁸⁶ 麗本：違；永樂北藏本及龍藏本：遺

⁸⁷ 麗本：諸法；永樂北藏本及龍藏本：諸法，是名佛所護念

⁸⁸ 麗本：實語者；永樂北藏本及龍藏本：非實語

⁸⁹ 麗本：常實；永樂北藏本及龍藏本：是性常實

何？非離生死得涅槃，名為聖諦。若人證如是四諦，是名世間實語者。

「梵天，當來有比丘不修身、不修戒、不修心、不修慧，是人說生⁹⁰相是苦諦、眾緣和合是集諦、滅法是⁹¹滅諦、以二法求相是道諦。」

佛言：「我說此愚人是外道徒黨，我非彼人師，彼非我弟子，是人墮於邪道，破失法故，說言有諦。梵天，且⁹²觀我坐道場時不得一法，是實是虛妄？若我不得法，是法寧可於眾中有言說、有論議、有教化耶？」

梵天言：「不也。世尊！」

「梵天，以諸法無所得故，諸法離自性故，我菩提是無貪愛相。」

叹功德品第五⁹³

爾時，思益梵天白佛言：「世尊！若如來於法無所得者，有何利益說：『如來得菩提名為佛。』？」

佛言：「梵天，於汝意云何？我所說法，若有為、若無為，是法為實？為虛妄耶？」

⁹⁰ 麗本：生死；永樂北藏本及龍藏本：生

⁹¹ 麗本：故是；永樂北藏本及龍藏本：是

⁹² 麗本：汝且；永樂北藏本及龍藏本：且

⁹³ 麗本：此處不分品，仍為四諦品第四

梵天言：「是法虛妄，非實。」

「於汝意云何？若法虛妄非實，是法為有？為無？」

梵天言：「世尊！若法虛妄，是法不應說有、不應說無。」

「於汝意云何？若法非有、非無，是法有得者不？」

梵天言：「無有得者。」

「梵天，如來坐道場時，唯⁹⁴得虛妄顛倒所起煩惱畢竟空性。以無所得故得，以無所知故知。所以者何？我所得法，不可見不可聞、不可覺不可識、不可取不可著、不可說不可難；出過一切法相，無語、無說、無有文字、無言說道。梵天，此法如是，猶如虛空。汝欲於如是法中得利益耶？」

梵天言：「不也。世尊！諸佛、如來甚為希有，成就未曾有法，深入大慈大悲，得如是寂滅相法，而以文字言說教人令得。世尊！其有聞是能信解者，當知是人從小功德來。世尊！是法一切世間之所難信。所以者何？世間貪著實，而是法無實、無虛妄；世間貪著法，而是法無法、

⁹⁴ 麗本：唯；永樂北藏本及龍藏本：惟

無非法；世間貪著涅槃，而是法無生死、無涅槃；世間貪著善法，而是法無善、無非善；世間貪著樂，而是法無苦、無樂；世間貪著佛出世，而是法無佛出世亦無涅槃；雖有說法，而是法非可說相；雖讚說僧，而僧即是無為。是故此法一切世間之所難信。譬如水中出火、火中出水，難可得信；如是煩惱中有菩提，菩提中有煩惱，是亦難信。所以者何？如來得是虛妄煩惱之性，亦⁹⁵無法不得，有所說法亦無有形，雖有所知亦無分別，證⁹⁶涅槃亦無滅者。

「世尊！若有善男子、善女人，能信解如是法義者；當知是人得脫諸見；當知是人已親近無量諸佛；當知是人已供養無量諸佛；當知是人為善知識所護；當知是人志意曠大；當知是人善根深厚；當知是人守護諸佛法藏；當知是人能善思量，起於善業；當知是人種姓尊貴，生如來家；當知是人能行大捨，捨諸煩惱；當知是人得持戒力，非煩惱力；當知是人得忍辱力，非瞋恚力；當知是人得精進力，無有疲懈；當知是人得禪定力，滅諸惡心；當知是人得智慧力，離惡邪見；

⁹⁵ 麗本：而；永樂北藏本及龍藏本：亦

⁹⁶ 麗本：雖證；永樂北藏本及龍藏本：證

當知是人一切惡魔不能得便；當知是人一切怨賊所不能破；當知是人不誑世間；當知是人是真語者，善說法相故；當知是人是實語者，說第一義故；當知是人善為諸佛之所護念；當知是人柔和軟善，同止安樂；當知是人名為大富，有聖財故；當知是人常能知足，行聖種故；當知是人易滿易養，離貪著故；當知是人得安隱心，到彼岸故；當知是人度未度者；當知是人解未解者；當知是人安未安者；當知是人滅未滅者；當知是人能示正道；當知是人能說解脫；當知是人為大醫王，善知諸藥；當知是人猶如良藥，善療眾病；當知是人智慧勇健；當知是人為有大力，堅固究竟；當知是人精進力，不隨他語；當知是人為如師子，無所怖畏；當知是人為如象王，其心調柔；當知是人為如老象，其心隨順；當知是人為如牛王，能導大眾；當知是人為大勇健，能破魔怨；當知是人為大丈夫，處眾無畏；當知是人無所忌難，得無畏法故；當知是人無所畏難，說真諦法故；當知是人具清白法如月盛滿；當知是人智慧光照猶如日月⁹⁷；當知是人除諸闇冥猶如執炬；當知是人樂行捨心，離諸憎愛；當知是人載育眾

⁹⁷ 麗本：明；永樂北藏本及龍藏本：月

生猶如地；當知是人洗諸塵垢猶如水；當知是人燒諸動念猶如火；當知是人於法無障猶如風；當知是人其心不動如須彌；當知是人其心堅固如金剛山；當知是人一切外道競勝論者所不能動；當知是人一切聲聞、辟支佛所不能測；當知是人多饒法寶猶如大海；當知是人煩惱不現如波陀羅；當知是人求法無厭；當知是人以智慧知足；當知是人能轉法輪如轉輪王；當知是人身色殊妙如天帝釋；當知是人心得自在如梵天王；當知是人說法音聲猶如雷震；當知是人降法甘露猶如時雨；當知是人能增長無漏根、力、覺分⁹⁸；當知是人已度生死污泥；當知是人入佛智慧；當知是人近佛菩提；當知是人能多學問無與等者；當知是人無有量已過量；當知是人智慧辯才無有障礙；當知是人⁹⁹憶念堅固得陀羅尼；當知是人知諸眾生深心所行；當知是人得智慧力，正觀諸法解達義趣；當知是人勤行精進，利安世間；當知是人超出於世；當知是人不可污染猶如蓮華；當知是人不為世法所覆；當知是人利根者所愛；當知是人多聞者所敬；當知是人智者所念；當知是人天人

⁹⁸ 麗本：覺分；永樂北藏本及龍藏本：覺分；當知是人能轉法輪如轉輪王；校勘：覺分

⁹⁹ 麗本：人得；永樂北藏本及龍藏本：人

¹⁰⁰供養；當知是人為坐禪者所禮¹⁰¹；當知是人善人所貴；當知是人聲聞、辟支佛之所貪慕；當知是人不貪小行；當知是人不覆藏罪、不顯功德；當知是人威儀備具生他淨心；當知是人身色端正見者悅樂；當知是人有大威德眾所宗仰；當知是人以三十二相莊嚴其身；當知是人能繼佛種；當知是人能護法寶；當知是人能供養僧；當知是人諸佛所見；當知是人為得法眼；當知是人以佛智慧而得受記；當知是人具足三忍；當知是人安住道場；當知是人破壞魔軍；當知是人得一切種智；當知是人轉於法輪；當知是人作無量佛事。

「若人信解如是法義不驚疑怖畏者，得如是功德，是人於諸佛阿耨多羅三藐三菩提甚深難解、難知、難信、難入，而能信受、讀誦、通利、奉持，為人廣說，如說修行，亦教他人如說修行。如是之人，我以一劫若減一劫說其功德，猶不能盡。」

思益梵天所問經卷第一

¹⁰⁰ 麗本：人天；永樂北藏本及龍藏本：天人

¹⁰¹ 麗本：之所敬禮；永樂北藏本及龍藏本：所禮

思益梵天所問經卷第二

姚秦三藏法師鳩摩羅什譯¹⁰²

如來五力說品第六¹⁰³

佛告梵天：「汝何能稱說是人功德？如如來以無閼¹⁰⁴智慧之所知乎，是人所有功德復過於此。若人能於如來所說文字、語言¹⁰⁵、章句，通達隨順、不違不逆、和合為一，隨其義理，不隨章句言辭，而善知言辭所應之相；知如來以何言¹⁰⁶說法、以何隨宜說法、以何方便說法、以何法門說法、以何大悲說法。梵天，若菩薩能知如來以是五力說法，是菩薩能作佛事。」

梵天言：「何謂如來所用五力？」

佛言：「一者，言¹⁰⁷說；二者，隨宜；三者，方便；四者，法門；五者，大悲。是名如來所用五力，一切聲聞、辟支佛所不能及。」

「世尊！云何名為說¹⁰⁸？」

¹⁰² 麗本：姚秦龜茲國三藏鳩摩羅什譯

¹⁰³ 麗本：解諸法品第四之餘（丹如來五力說品第六五幅世尊何謂大悲下為如來大悲品第七）；永樂北藏本及龍藏本：如來五力說品第六

¹⁰⁴ 麗本：尋；永樂北藏本及龍藏本：閼

¹⁰⁵ 麗本：言說；永樂北藏本及龍藏本：語言

¹⁰⁶ 麗本：語；永樂北藏本及龍藏本：言

¹⁰⁷ 麗本：語；永樂北藏本及龍藏本：言

¹⁰⁸ 麗本：何謂為說法；永樂北藏本及龍藏本：云何名為說

佛言：「梵天，如來說過去法，說未來、現在法，說垢淨法，說世間、出世間法，說有罪、無罪法，說有漏、無漏法，說有為、無為法，說我、人、眾生、壽命者¹⁰⁹法，說得證法，說生死、涅槃法。梵天，當知是¹¹⁰言說，如幻人說，無決定故；如夢中說，虛妄見故；如響聲說，從空出故；說如影，眾緣和合¹¹¹故；說如鏡中像，因不入鏡故；說如野馬，顛倒見故；說如虛空，無生滅故。當知是說為無所說，諸法相不可說故。梵天，若菩薩能知此諸言說¹¹²者，雖有一切言說，而於諸法無所貪著；以無¹¹³貪著故得無礙辯才；以是辯才，若恒河沙劫說法無盡無礙，諸有言說不壞法性，亦復不著不壞法性。梵天，是名如來言說¹¹⁴。」

梵天言：「何謂如來¹¹⁵隨宜？」

佛言：「如來或垢法說淨，淨法說垢。菩薩於此應知如來隨宜所說。梵天，何謂如來¹¹⁶垢法說淨？不得垢法性故。何謂淨法說垢？貪著淨法

¹⁰⁹ 麗本：命；永樂北藏本及龍藏本：命者

¹¹⁰ 麗本：是諸；永樂北藏本及龍藏本：是

¹¹¹ 麗本：合；永樂北藏本及龍藏本：和合

¹¹² 麗本：說；永樂北藏本及龍藏本：言說

¹¹³ 麗本：不；永樂北藏本及龍藏本：無

¹¹⁴ 麗本：說也；永樂北藏本及龍藏本：言說

¹¹⁵ 麗本：世尊！何謂；永樂北藏本及龍藏本：何謂如來

¹¹⁶ 麗本：謂；永樂北藏本及龍藏本：謂如來

故。又，梵天，我說布施即是涅槃，凡夫¹¹⁷無智不能善知¹¹⁸隨宜所說。菩薩應如是思量：『布施後得大富，此中無法可¹¹⁹從一念至一念，若不從一念至一念即是諸法實相，諸法實相即是涅槃。』持戒是涅槃，不作不起故；忍辱是涅槃，念念滅故；精進是涅槃，無所取故；禪定是涅槃，不貪味故；智慧是涅槃，不得相故；婬¹²⁰欲是實際，法性無欲故；瞋恚是實際，法性無瞋故；愚癡是實際，法性無癡故；生死是涅槃，無退無生故；涅槃是生死，以貪著故；實語是虛妄，生語見故；虛妄是實語，為增上慢人故。

「又，梵天，如來以隨宜故，或自說我，是¹²¹常邊者；或自說我，是¹²²斷邊者；或自說我，是¹²³無作者；或自說我，是邪見者；或自說我，是不信者；或自說我，是不知報恩者；或自說我，是食吐者；或自說我，是不受者。如來無有如是諸事而有此說¹²⁴，當知是為隨宜所說，欲令眾生捨增上慢故。若菩薩善通達如來隨宜所說¹²⁵者，

¹¹⁷ 麗本：人；永樂北藏本及龍藏本：夫

¹¹⁸ 麗本：解；永樂北藏本及龍藏本：知

¹¹⁹ 麗本：可得；永樂北藏本及龍藏本：可

¹²⁰ 麗本：貪；永樂北藏本及龍藏本：婬

¹²¹ 麗本：是說；永樂北藏本及龍藏本：是

¹²² 麗本：是說；永樂北藏本及龍藏本：是

¹²³ 麗本：是說；永樂北藏本及龍藏本：是

¹²⁴ 麗本：如此諸事；永樂北藏本及龍藏本：如是諸事而有此說

¹²⁵ 麗本：說；永樂北藏本及龍藏本：所說

若聞佛出則便信受，示眾生善業色身果報故；若聞佛不出亦信受，諸佛¹²⁶法性身故；若聞佛說法亦信受，為喜樂文字眾生故；若聞佛不說法亦信受，諸法¹²⁷位性以不¹²⁸可說故；若聞有涅槃亦信受，滅顛倒所起煩惱故；若聞無涅槃亦信受，諸法無生相無¹²⁹滅相故；若聞有眾生亦信受，入世諦門故；若聞無眾生亦信受，入第一義故。梵天，菩薩如是善知如來隨宜所說，於諸音聲無疑無畏，亦能利益無量眾生。」

「世尊！何謂方便？」

佛言：「如來為眾生說布施得大富，持戒得生天，忍辱得端正，精進得具諸功德，禪定得法喜，智慧得捨諸煩惱，多聞得智慧故，行十善道得人天福樂故，慈悲喜捨得生梵世故，禪定得如實智慧故，智慧¹³⁰得道果故，學地得無學地故，辟支佛地得消諸供養故，佛地得無量智慧故，涅槃滅¹³¹一切煩¹³²惱故。梵天，我如是方便為眾生讚說是法。如來實不得我、人、眾生、壽命者，

¹²⁶ 麗本：知是諸佛；永樂北藏本及龍藏本：諸佛

¹²⁷ 麗本：知諸法；永樂北藏本及龍藏本：諸法

¹²⁸ 麗本：不；永樂北藏本及龍藏本：以不

¹²⁹ 麗本：生；永樂北藏本及龍藏本：生相無

¹³⁰ 麗本：如實智慧；永樂北藏本及龍藏本：智慧

¹³¹ 麗本：得滅；永樂北藏本及龍藏本：滅

¹³² 麗本：苦；永樂北藏本及龍藏本：煩

亦不得施、亦不得慳，亦不得戒、亦不得毀戒，亦不得忍辱、亦不得瞋恚，亦不得精進、亦不得懈怠，亦不得禪定、亦不得亂心，亦不得智慧、亦不得智慧果，亦不得菩提、亦不得涅槃，亦不得苦、亦不得樂。梵天，若眾生聞是法者勤行精進，是人為何利故勤行精進不得是法？若須陀洹果、斯陀含果、阿那含果、阿羅漢果、辟支佛道、阿耨多羅三藐三菩提乃至無餘涅槃¹³³亦復不得。梵天，是名如來方便說也¹³⁴。菩薩於此方便¹³⁵應勤精進，令諸眾生得於法利。」

「世尊！何謂如來法門？」

佛言：「眼是解脫門，耳、鼻、舌、身、意是解脫門。所以者何？眼空，無我、無我所，性自爾；耳、鼻、舌、身、意空，無我、無我所，性自爾。梵天，當知六¹³⁶入，皆是¹³⁷解脫門，正行則不虛誑故；色、聲、香、味、觸、法亦復¹³⁸；一切諸法皆入是門，所謂空門、無相門、無作門、無生門、無滅門、無所從來門、無所從去門、無退門、無起門、性常清淨門、離自體門。又，梵

¹³³ 麗本：涅槃；永樂北藏本及龍藏本：無餘涅槃

¹³⁴ 麗本：法；永樂北藏本及龍藏本：也

¹³⁵ 麗本：方便說法中；永樂北藏本及龍藏本：方便

¹³⁶ 麗本：諸；永樂北藏本及龍藏本：六

¹³⁷ 麗本：入此；永樂北藏本及龍藏本：是

¹³⁸ 麗本：亦復如是；永樂北藏本及龍藏本：亦復

天，如來於一切文字¹³⁹示是解脫門。所以者何？諸文字無合無用¹⁴⁰。梵天，當知如來於一切文字中說聖諦、說解脫門，如來所說法無有垢，一切諸法皆入解脫令住涅槃，是名如來說法入於法門。菩薩於此法門應當修學。」

如來大悲品第七¹⁴¹

「世尊！何謂大悲？」

佛言：「如來以三十二種大悲救護眾生。何等三十二？一切諸法¹⁴²無我，而眾生不信不解¹⁴³，如來於此而起大悲。一切諸法無眾生，而眾生說有眾生，如來於此而起大悲。一切法無壽命者，而眾生說有壽命者，如來於此而起大悲。一切法無人，而眾生說有人，如來於此而起大悲。一切法無所有，而眾生住於有見，如來於此而起大悲。一切法無住，而眾生有住，如來於此而起大悲。一切法無歸處，而眾生樂於歸處，如來於此而起大悲。一切法非我所，而眾生著於我所，如來於此而起大悲。一切法無所屬，而眾生計有所屬，

¹³⁹ 麗本：字中；永樂北藏本及龍藏本：字

¹⁴⁰ 麗本：用，性鈍故；永樂北藏本及龍藏本：用

¹⁴¹ 麗本：（此處不分品）；永樂北藏本及龍藏本：如來大悲品第七

¹⁴² 麗本：法；永樂北藏本及龍藏本：諸法

¹⁴³ 麗本：解，說有我生；永樂北藏本及龍藏本：解

如來於此而起大悲。一切法無取相，而眾生有取相，如來於此而起大悲。一切法無生，而眾生住於有生，如來於此而起大悲。一切法無退生，而眾生住於退生，如來於此而起大悲。一切法無垢，而眾生著垢，如來於此而起大悲。一切法離染，而眾生有染，如來於此而起大悲。一切法離瞋，而眾生有瞋，如來於此而起大悲。一切法離癡，而眾生有癡，如來於此而起大悲。一切法無所從來，而眾生著有所來¹⁴⁴，如來於此而起大悲。一切法無所去，而眾生著於後生¹⁴⁵，如來於此而起大悲。一切法無起，而眾生計有所起，如來於此而起大悲。一切法無戲論，而眾生著於戲論，如來於此而起大悲。一切法空而眾生墮於有見，如來於此而起大悲。一切法無相，而眾生著於有相，如來於此而起大悲。一切法無作，而眾生著於有作，如來於此而起大悲。世間常共瞋恚¹⁴⁶諍競，如來於此而起大悲。世間邪見顛倒行於邪道，欲令住於正道，如來於此而起大悲。世間饕餮無有厭足，互相陵¹⁴⁷奪，欲令眾生住於聖財信、戒、聞、施、慧等，如來於此而起大悲。眾生是產業、

¹⁴⁴ 麗本：從來；永樂北藏本及龍藏本：來

¹⁴⁵ 麗本：有去；永樂北藏本及龍藏本：後生

¹⁴⁶ 麗本：恨；永樂北藏本及龍藏本：恚

¹⁴⁷ 麗本：數；永樂北藏本及龍藏本：陵

妻子、恩愛之僕，於此危脆之物生堅固想，欲令眾生悉知¹⁴⁸無常，如來於此而起大悲。眾生身為怨賊，貪著養育以為親友，欲為眾生作真知識，令畢眾苦究竟涅槃，如來於此而起大悲。眾生好行欺誑，邪命自活，欲令眾生¹⁴⁹行於正命，如來於此而起大悲。眾生樂著眾苦不淨居家，欲令眾生¹⁵⁰出於三界，如來於此而起大悲。一切諸法從因緣有，而眾生於聖解脫而生¹⁵¹懈怠，我當為說¹⁵²精進令樂解脫，如來於此而起大悲。眾生棄捨最上無礙智慧，求於聲聞辟支佛道，我當引導¹⁵³令發大心緣於佛法，如來於此而起大悲。梵天，如來如是於諸眾生行此三十二種大悲，是故如來名為行大悲者。若菩薩於眾生中常能修集此大悲心，則為阿鞞跋致¹⁵⁴，為大福田威德具足，常能利益一切眾生。」

說是大悲法門品時，三萬二千人皆發阿耨多羅三藐三菩提心，八千菩薩得無生法忍。

¹⁴⁸ 麗本：知悉；永樂北藏本及龍藏本：悉知

¹⁴⁹ 麗本：令；永樂北藏本及龍藏本：令眾生

¹⁵⁰ 麗本：令；永樂北藏本及龍藏本：令眾生

¹⁵¹ 麗本：生於；永樂北藏本及龍藏本：而生

¹⁵² 麗本：欲說；永樂北藏本及龍藏本：我當為說

¹⁵³ 麗本：欲引導之；永樂北藏本及龍藏本：我當引導

¹⁵⁴ 麗本：入阿惟越致；永樂北藏本及龍藏本：阿鞞跋致

幻化品第八¹⁵⁵

爾時，網明菩薩摩訶薩白佛言：「世尊！是思益梵天云何聞¹⁵⁶大悲法¹⁵⁷而不喜悅？」

思益¹⁵⁸言：「善男子，若識在二法則有喜悅，若識在無二實際法中則無喜悅。譬如幻人見幻戲事無所喜悅，菩薩知諸法相如是，則於如來若說法、若神通亦無喜悅。又，善男子，如佛所化人聞佛說法不喜不悅，菩薩知諸法相與化無異，於如來所不加喜悅¹⁵⁹，於餘¹⁶⁰眾生無下劣想。」

網明言：「梵天，汝今見諸法如幻相耶？」

梵天言：「若人分別諸法者，汝當問之！」

網明言：「汝今於何處行？」

梵天言：「一切凡夫行¹⁶¹處，吾於彼行。」

網明言：「凡夫人行貪欲、瞋恚、愚癡、身見、疑網，行我¹⁶²、我所等邪道，汝於是處行耶？」

梵天言：「善男子，汝欲得凡夫法決定相耶？」

網明言：「我尚不欲決定得凡夫，何況凡夫

¹⁵⁵ 麗本：難問品第五（丹幻化品第八）；永樂北藏本及龍藏本：幻化品第八

¹⁵⁶ 麗本：聞是；永樂北藏本及龍藏本：聞

¹⁵⁷ 麗本：法門；永樂北藏本及龍藏本：法

¹⁵⁸ 麗本：梵天；永樂北藏本及龍藏本：思益

¹⁵⁹ 麗本：悅；永樂北藏本：悅；龍藏本：說；校勘：悅

¹⁶⁰ 麗本：諸；永樂北藏本及龍藏本：餘

¹⁶¹ 麗本：所行；永樂北藏本及龍藏本：行

¹⁶² 麗本：我；永樂北藏本及龍藏本：行我

法？」

「善男子，若是法無決定者，寧有貪欲、瞋恚、愚癡法耶？」

網明言：「無也。」

「善男子，一切法離貪瞋¹⁶³癡相，行相亦如是。善男子，凡夫行、賢聖行皆無二、無差別。善男子，一切行非行，一切說非說，一切道非道。」

網明言：「何謂一切行非行？」

梵天言：「善男子，若人千萬億劫行道，於法性不增不減，是故言一切行非行。」

「何謂一切說非說？」

梵天言：「善男子，如來以不可¹⁶⁴說相說一切法，是故言一切說非說。」

「何謂一切道非道？」

梵天言：「以無所至故，一切道非道。」

爾時，世尊讚思益梵天言：「善哉！善哉！說諸法相應當如是。」

網明菩薩謂梵天言：「汝說『一切凡夫行處，吾於彼行』者，則有行相！」

梵天言：「若我有所生處，應有行相。」

¹⁶³ 麗本：恚；永樂北藏本及龍藏本：瞋

¹⁶⁴ 麗本：不；永樂北藏本及龍藏本：不可

網明言：「汝若不生，云何教化眾生？」

梵天言：「佛所化生，吾如彼生。」

網明言：「佛化所¹⁶⁵生，則無¹⁶⁶生處。」

梵天言：「寧可見不？」

網明言：「以佛力故見。」

梵天言：「我生亦如是，以業力故。」

網明言：「汝於起業中行耶？」

梵天言：「我不於起業中行。」

網明言：「云何言以業力故？」

梵天言：「如業性，力亦如是；是二不出於如。」

爾時，舍利弗白佛言：「世尊！若有能入是菩薩隨宜所說法中者，得大功德。所以者何？世尊！乃至聞是上人名字尚得大利，何況聞其所說？譬如有樹不依於地，在虛空中而現根莖、枝葉、華果，甚為希有；此人行相亦復如是，不住一切法，而於十方現有行、有生死，亦有如是智慧辯才。世尊！若有善男子、善女人聞是智慧自在力者，其誰不發阿耨多羅三藐三菩提心？」

爾時，有一菩薩名曰普華，在會中坐，謂長

¹⁶⁵ 麗本：所化；永樂北藏本及龍藏本：化所

¹⁶⁶ 麗本：無有；永樂北藏本及龍藏本：則無

老舍利弗：「仁者已得法性，佛亦稱汝於智慧人中為最第一，何以不能現如是智慧辯才自在力耶？」

舍利弗言：「普華！佛諸弟子隨其智力能有所說。」

普華言：「舍利弗！法性有多少耶？」

舍利弗言：「無也。」

普華言：「汝何以言佛諸弟子隨其智力能有所說？」

舍利弗言：「隨所得法而有所說。」

普華言：「汝證法性無量相耶？」

舍利弗言：「然！」

普華言：「汝云何言隨所得法而有所說？如法性無量相，得亦如是；如得，說亦如是。何以故？法性無量故。」

舍利弗言：「法性非得相。」

普華言：「若法性非得相者，汝出法性得解脫耶？」

舍利弗言：「不也！」

普華言：「何故爾耶？」

舍利弗言：「若出法性得解脫者，則壞法性。」

普華言：「是故，舍利弗！如仁¹⁶⁷得道，法性亦爾。」

舍利弗言：「我為聽來，非為說也。」

普華言：「一切法皆入法性，此中寧有說有¹⁶⁸聽者不？」

舍利弗言：「不也。」

普華言：「若然者，汝何故言『我為聽來，非為說也¹⁶⁹』？」

舍利弗言：「佛說二人得福無量：一者，專精說法；二者，一心聽受。是故汝今應說，我當聽受。」

普華言：「汝入滅盡定，能聽法耶？」

舍利弗言：「入滅盡定，無有二行而聽法也。」

普華言：「汝信佛說一切法是滅盡相不？」

舍利弗言：「然！一切法皆滅盡相，我信是說。」

普華言：「若然者，舍利弗常不能聽法。所以者何？一切法常滅盡相故。」

舍利弗言：「汝能不起於¹⁷⁰定而說法耶？」

普華言：「頗有一法非是定耶？」

¹⁶⁷ 麗本：仁者；永樂北藏本及龍藏本：仁

¹⁶⁸ 麗本：者；永樂北藏本及龍藏本：有

¹⁶⁹ 麗本：耶；永樂北藏本及龍藏本：也

¹⁷⁰ 麗本：于；永樂北藏本及龍藏本：於

舍利弗言：「無也。」

普華言：「是故當¹⁷¹知一切凡夫常在於定。」

舍利弗言：「以何定故，一切凡夫常在定耶？」

普華言：「以不壞法性三昧故。」

舍利弗言：「若然者，凡夫、聖人無有差別。」

普華言：「如是，如是！我不欲令凡夫、聖人有差別也。所以者何？聖人無所斷，凡夫無所生，是二不出法性平等之相。」

舍利弗言：「何等是諸法平等相？」

普華言：「如舍利弗所得知見。舍利弗！汝生賢聖法耶？」

答言：「不也！」

「汝滅凡夫法耶？」

答言：「不也！」

「汝得賢聖法耶？」

答言：「不也。」

「汝見凡夫法耶？」

答言：「不也。」

「舍利弗！汝何知見，說言得道？」

答言：「汝不聞凡夫如即是漏盡解脫如，漏盡解脫如即是無餘涅槃如？」

¹⁷¹ 麗本：常；永樂北藏本及龍藏本：當

「舍利弗！是如名不異如、不壞如，應以是如知一切法。」

爾時，舍利弗白佛言：「世尊！譬如大火，一切諸炎皆是燒相；如是，諸善男子所說法皆入法性。」

佛告舍利弗：「如汝所言，是諸善男子所說法皆入法性。」

爾時，網明¹⁷²謂舍利弗：「佛說仁者於智慧人中為最第一，以何智慧得第一乎¹⁷³？」

舍利弗言：「所謂聲聞因聲得解，以是智慧說我於中為第一耳，非謂菩薩。」

網明言：「智慧是戲論相耶？」

答言：「不也。」

網明言：「智慧非平等相耶？」

答言：「是¹⁷⁴。」

網明言：「今仁者得平等智慧，云何說智慧有量？」

答言：「善男子，以法性相故，智慧無量；隨入法性多少故，智慧有量。」

網明言：「無量法終不作有量。仁者何故說

¹⁷² 麗本：網明菩薩；永樂北藏本及龍藏本：網明

¹⁷³ 麗本：耶；永樂北藏本及龍藏本：乎

¹⁷⁴ 麗本：如是；永樂北藏本及龍藏本：是

智慧有量？」

即時，舍利弗默然不答。

菩薩光明品第九¹⁷⁵

爾時，長老大迦葉承佛聖旨，白佛言：「世尊！是網明菩薩以何因緣號網明乎？」

佛告網明：「善男子，現汝福報光明因緣，令諸天、人、一切世間皆得歡喜，其有福德因緣者當發菩提心。」

於是，網明即受佛教，偏袒右肩，從右手赤白莊嚴爪¹⁷⁶指間放大光明，普照十方無量無邊阿僧祇佛國，皆悉通達。其中地獄、畜生、餓鬼、盲聾瘖瘂、手足拘攣¹⁷⁷、老病苦痛、貪欲瞋恚愚癡、裸形醜陋、貧窮飢渴、囚圜繫閉、困厄垂死、慳貪破戒瞋恚、懈怠妄念無慧、少於聞見、無慚無愧、墮邪疑網，如是等眾生，遇斯光者皆得快樂，無有眾生為貪欲、瞋恚、愚癡、憍慢、憂愁、懷恨等之所惱也。其在佛前大會之眾：菩薩摩訶薩、天、龍、夜叉、乾闥婆等，及比丘、比丘尼、優婆塞、優婆夷眾，是諸眾生同一金色與佛無異，

¹⁷⁵ 麗本：不分品，注曰：丹爾時上有菩薩光明品第九；永樂北藏本及龍藏本：菩薩光明品第九

¹⁷⁶ 麗本：抓；永樂北藏本及龍藏本：爪

¹⁷⁷ 麗本：癱；永樂北藏本及龍藏本：攣

有三十二相、八十隨形好、無見頂者，皆坐寶蓮華座，寶交絡蓋羅覆其上，等無差別。諸會眾生皆得快樂，譬如菩薩入發喜莊嚴三昧。時諸大眾得未曾有，各各相見如佛無異，不見佛身為大己身為小。

又以光明力故，尋時下方有四菩薩從地涌¹⁷⁸出，合掌而立，欲共禮佛，作是念言：「何者真佛？我欲禮敬。」

即聞空中聲曰：「是網明菩薩光明之力，一切大眾同一金色，與佛不¹⁷⁹異。」

時，四菩薩發希有心，作如是言：「今此會中¹⁸⁰其色無異，一切諸法亦復如是。若我此言誠實無虛，世尊釋迦牟尼當現異相，令我今得供養禮事。」

即時，佛以蓮華寶師子座上昇虛空高一多羅樹。於是四菩薩頭面禮佛足，作如是言：「如來智慧不可思議，網明菩薩福德本願亦不可思議，能放如是無量光明。」

爾時，佛告網明菩薩言：「善男子，汝今已作佛事，令無量眾生住於佛道，可攝光明。」於

¹⁷⁸ 麗本：踊；永樂北藏本及龍藏本：涌

¹⁷⁹ 麗本：無；永樂北藏本及龍藏本：不

¹⁸⁰ 麗本：眾會；永樂北藏本及龍藏本：會中

是網明菩薩¹⁸¹即受佛教，還攝光明。攝光明已，此諸大眾威儀色相還復如故，見佛坐本師子座上。

爾時，長老大迦葉白佛言：「世尊！此四菩薩從何所來？」

四菩薩言：「我等從下方世界來。」

大迦葉¹⁸²言：「其國何名？佛號何等？」

四菩薩言：「國名現諸寶莊嚴，佛號一寶蓋，今現在¹⁸³說法。」

大迦葉言：「其佛國土去此幾何？」

四菩薩言：「佛自知之。」

大迦葉言：「汝等何故來此？」

四菩薩言：「是網明菩薩光明照彼，我等遇之，即聞釋迦牟尼佛名及網明菩薩，是故我等今來見佛并網明上人。」

迦葉¹⁸⁴白佛言：「世尊！一寶蓋佛現諸寶莊嚴世界，去此幾何？」

佛言：「去此七十二恒河沙佛土。」

大迦葉言：「世尊！是四菩薩從彼發來，幾時至此？」

¹⁸¹ 麗本：網明；永樂北藏本及龍藏本：網明菩薩

¹⁸² 麗本：迦葉；永樂北藏本及龍藏本：大迦葉

¹⁸³ 麗本：現；永樂北藏本及龍藏本：現在

¹⁸⁴ 麗本：大迦葉；永樂北藏本及龍藏本：迦葉

佛言：「如一念頃，於彼不現忽然而至。」

大迦葉言：「世尊！此諸菩薩光明遠照，神通速疾甚為希有！今¹⁸⁵網明菩薩光明遠照，是四菩薩發來速疾。」

佛言迦葉：「如汝所說，菩薩摩訶薩所行不可思議，一切聲聞、辟支佛所不能及。」

爾時，長老大迦葉謂網明菩薩言：「善男子，汝現光明照此大會，皆作金色，以何因緣？」

網明言：「長老大迦葉，可問世尊，當為汝說！」

即時，大迦葉以此白佛。

佛言：「迦葉，是網明菩薩成佛時，其會大眾同一金色，咸共信樂一切智慧。其佛國土乃至無聲聞、辟支佛名，唯有清淨諸菩薩摩訶薩會。」

大迦葉白佛言：「世尊！生彼菩薩當知如佛等無有異¹⁸⁶。」

佛言：「如汝所說，生彼菩薩當知如佛。」

於是，會中四萬四千人皆發阿耨多羅三藐三菩提心已，願生彼國，白佛言：「世尊！若網¹⁸⁷明菩薩得成佛時，我等當¹⁸⁸生其國！」

¹⁸⁵ 麗本：今是；永樂北藏本及龍藏本：今

¹⁸⁶ 麗本：佛；永樂北藏本及龍藏本：佛等無有異

¹⁸⁷ 麗本：網；永樂北藏本及龍藏本：世尊！若網

¹⁸⁸ 麗本：願；永樂北藏本及龍藏本：當

¹⁸⁹爾時，長老大迦葉白佛言：「世尊！網明菩薩幾時當得阿耨多羅三藐三菩提？」

佛言：「迦葉，汝自問網明。」

於是，迦葉問網明菩薩言：「善男子，仁者幾時當得阿耨多羅三藐三菩提？」

網明言：「大迦葉，若有問幻所化人：『汝幾時當得阿耨多羅三藐三菩提？』是幻人當云何答？」

大迦葉言：「善男子，幻所化人無決定相，當何所答？」

網明言：「大迦葉，一切諸法亦如幻所化人，無決定相，誰可問言：『汝幾時當成阿耨多羅三藐三菩提？』」

大迦葉言：「善男子，幻所化人離於自相，無異、無別、無所志願。汝亦如是耶？若如是者，汝云何能利益無量眾生？」

網明言：「阿耨多羅三藐三菩提即是一切眾生性，一切眾生性即是幻性，幻性即是一切法性。於是法中，我不見有利、不見無利。」

大迦葉言：「善男子，汝今不令眾生住菩提耶？」

¹⁸⁹ 麗本此处分品，問談品第六（丹無此品名），永樂北藏本及龍藏本不分品

網明言：「諸佛菩提有住相耶？」

大迦葉言：「無也！」

網明言：「是故我¹⁹⁰不令眾生住於菩提，亦不令住聲聞、辟支佛道。」

大迦葉言：「善男子，汝今欲趣何所？」

網明言：「我所趣，如如趣。」

大迦葉言：「如無所趣，亦無有轉。」

網明言：「如如，無趣無轉，一切法住如相故，我¹⁹¹無趣無轉。」

大迦葉言：「若無趣無轉，汝云何教化眾生？」

網明言：「若人發願，則是不能教化眾生；若人於法有轉，是亦不能教化眾生。」

大迦葉言：「善男子，汝不轉眾生生死耶？」

網明言：「我尚不得生死，何況於生死中而轉眾生？」

大迦葉言：「汝不令眾生得涅槃耶？」

網明言：「我尚不見涅槃，何況教化眾生令住涅槃？」

大迦葉言：「善男子，若汝不得生死、不見涅槃，何故今為無量眾生行於菩提，此豈不為滅

¹⁹⁰ 麗本：我今；永樂北藏本及龍藏本：我

¹⁹¹ 麗本：我亦；永樂北藏本及龍藏本：我

度眾生耶？」

網明言：「若菩薩得生死分別涅槃，因眾生成行¹⁹²菩提，此則不應說為菩薩。」

大迦葉言：「善男子，汝今於何處行？」

網明言：「我非生死中行，非涅槃中行，亦不以眾生相行。大迦葉，如汝所問『汝何處行』者，如佛所化人行處，吾於彼行。」

大迦葉言：「佛所化人無有行處。」

網明言：「當知一切眾生所行亦如是相。」

大迦葉言：「佛所化人無貪、無恚、無癡，若一切眾生所行如是相者，眾生貪、恚、癡從何所起？」

網明言：「我今問汝，隨意答我。大迦葉，汝今寧有貪恚癡不？」

答言：「無¹⁹³也。」

網明言：「是貪、恚、癡盡滅耶？」

答言：「不也。」

網明言：「若大迦葉今無貪、恚、癡，亦不盡滅者，汝置貪、瞋¹⁹⁴、癡於何所耶？」

答言：「善男子，凡夫從顛倒起妄想分別，

¹⁹² 麗本：行於；永樂北藏本及龍藏本：行

¹⁹³ 麗本：不；永樂北藏本及龍藏本：無

¹⁹⁴ 麗本：恚；永樂北藏本及龍藏本：瞋

生貪、恚、癡耳。賢聖法中善知顛倒實性故，無妄想分別，是以無貪、恚、癡。」

「大迦葉，於汝意云何？若法從顛倒起，是法為實？為虛妄耶？」

答言：「是法虛妄，非是實也。」

網明言：「若法非實，可令實耶？」

答言：「不也！」

網明言：「若法非實，仁者欲於是中得貪、恚、癡耶？」

答言：「不也。」

網明言：「若然，何者¹⁹⁵是貪恚癡能惱眾生者？」

答言：「善男子，若爾者¹⁹⁶，一切¹⁹⁷從本已來離貪、恚、癡相。」

網明言：「以是故，我說一切法相如佛所化。」

說是法時，四萬四千菩薩得柔順法忍。

¹⁹⁵ 麗本：所；永樂北藏本及龍藏本：者

¹⁹⁶ 麗本：爾；永樂北藏本及龍藏本：爾者

¹⁹⁷ 麗本：一切法；永樂北藏本及龍藏本：一切

菩薩受記品第十¹⁹⁸

爾時，長老大迦葉白佛言：「世尊！若網明菩薩所見，眾生不應復畏墮三惡道；若聞網明所說法者，魔不得便；若為網明所教化者，不畏墮聲聞、辟支佛道。世尊！願說網明功德莊嚴國土。」

佛言：「迦葉，是網明菩薩在在國土遊行之處，利益無量眾生。迦葉，汝見網明所放光明不？」

答言：「已見。」

佛言：「若三千大千世界滿中芥子尚可算數，今網明光明令諸眾生住菩提者不可數也。迦葉，是網明菩薩所放光明饒益尚爾，何況說法？汝今諦聽！我當粗略說其功德。」

「迦葉，是網明菩薩過七百六十萬阿僧祇劫當得作佛，號普光自在王如來、應供、正遍知，世界曰¹⁹⁹集妙功德。其佛趣菩提樹時，國中諸魔、魔民悉皆正定於阿耨多羅三藐三菩提。其佛國土，以真栴檀寶為地，地平如掌，柔軟²⁰⁰細滑，如加²⁰¹陵伽衣，處處皆以眾寶莊嚴，無三惡道亦無八

¹⁹⁸ 麗本：不分品，注曰：丹有菩薩授記品第二十五幅梵天上有薩婆若品第十一；永樂北藏本及龍藏本：菩薩受記品第十

¹⁹⁹ 麗本：名曰；永樂北藏本及龍藏本：曰

²⁰⁰ 麗本：濡；永樂北藏本及龍藏本：軟

²⁰¹ 麗本：迦；永樂北藏本及龍藏本：加

難。其國廣長，皆以妙寶蓮華色香且²⁰²好以為校²⁰³飾。普光自在王如來有無量菩薩僧，善修無量法門，得無量自在神通，皆以光明莊嚴其身；得諸陀羅尼藏無量²⁰⁴辯才，善能說法；光明神力皆悉通達，能破魔怨；慚愧念慧，諸妙功德以修其心。彼佛國土無有女人，其諸菩薩皆於寶蓮華中結跏²⁰⁵趺坐，自然化生，以禪樂為食。諸所須物，經行之處、房舍、床榻、園林、浴池，應念即至。

「迦葉，是普光自在王如來不以文字說法，但放光明照諸菩薩，即得²⁰⁶無生法忍；其佛光明復照十方通達無礙，令諸眾生得離煩惱。又其光明常出三十二種清淨法音。何等三十二？所謂諸法空，無眾生見故；諸法無相，離分別故；諸法無作，出三界故；諸法離欲，性寂滅故；諸法離瞋，無有礙故；諸法離癡，無闇冥故；諸法無所從來，本無生故；諸法無所去，無所至故；諸法不住，無所依故；諸法過三世，去、來、現在無所有故；諸法無異，其性一故；諸法不生，離於報故；諸法無業，業報作者不可得故；諸法不作，

²⁰² 麗本：妙；永樂北藏本及龍藏本：且

²⁰³ 麗本：校；永樂北藏本及龍藏本：校

²⁰⁴ 麗本：礙；永樂北藏本及龍藏本：量

²⁰⁵ 麗本：加；永樂北藏本及龍藏本：跏

²⁰⁶ 麗本：光觸其身，即得；永樂北藏本及龍藏本：即得

無所起故；諸法無起，無為性故；諸法無為，離生滅故；諸法真，不從和合生故；諸法實，一道門故；諸法無眾生，眾生不可得故；諸法無我，第一義故；諸法鈍，無所知故；諸法捨，離憎愛故；諸法離煩惱，無有熱故；諸法無垢，性不污故；諸法一相，離欲際故；諸法離相，常定故；諸法住實際，性不壞故；諸法如相，不分別故；諸法入法性，遍入故；諸法無緣，諸緣²⁰⁷不合故；諸法是菩提，如實見故；諸法是涅槃，無因緣故。迦葉，普光自在王如來光明常出如是清淨法音，亦能²⁰⁸令諸菩薩施作佛事。其佛國土無有魔事，佛壽無量阿僧祇劫。」

大迦葉白佛言：「若人欲得清淨佛土者，應取如網明菩薩所修功德，具足清淨國土。」

「如是，迦葉，網明²⁰⁹菩薩於諸無量阿僧祇佛所，隨所願修²¹⁰，功德具足故。」

爾時，思益梵天謂網明菩薩：「仁者已得從佛受記！」

網明言：「一切眾生皆從佛受記。」

梵天言：「於何事中而得受記？」

²⁰⁷ 麗本：緣；永樂北藏本及龍藏本：諸緣

²⁰⁸ 麗本：能；永樂北藏本及龍藏本：亦能

²⁰⁹ 麗本：是網明；永樂北藏本及龍藏本：網明

²¹⁰ 麗本：隨願修行；永樂北藏本及龍藏本：隨所願修

網明言：「隨業受報而得受記。」

梵天言：「汝作何業而得受記？」

網明言：「若業非身作、非口作、非意作，是業可得示不？」

梵天言：「不可示也。」

網明言：「菩提是起作相耶？」

梵天言：「不也。何以故？菩提是無為，非起作相²¹¹。」

網明言：「可以起作相得無為菩提不？」

梵天言：「不也。」

「梵天，是故當知，若無業、無業報，無諸行、無起諸行，是名菩提；如菩提性，得亦如是；如得性，受記亦如是，不可以起作法而得受記。」

梵天言：「善男子，汝不行六波羅蜜，然後得受記耶？」

網明言：「如汝所說，菩薩行六波羅蜜而得受記。梵天，若菩薩捨一切煩惱，名為檀波羅蜜。於諸法無所起，名為尸羅波羅蜜。於諸法無所傷，名為羸提波羅蜜。於諸法離相，名為毗梨耶波羅蜜。於諸法無所住，名為禪波羅蜜。於諸法無戲論，名為般若波羅蜜。梵天，菩薩如是行六波羅

²¹¹ 麗本：相故；永樂北藏本及龍藏本：相

蜜，於何處行？」

梵天言：「無處行也。所以者何？凡有所²¹²行皆是不行；若行即是不行，若不行即是行。」

「梵天，以是故，當知無所行是菩提。如汝所問『汝得受菩提記』者，如如法性得受記，我所受記亦如是。」

梵天言：「善男子，如如法性無受記。」

網明言：「諸菩薩受記相皆亦如是，如如²¹³法性。」

爾時，思益梵天白佛言：「世尊！菩薩以何行，諸佛授阿耨多羅三藐三菩提記？」

佛言：「若菩薩不行生法、不行滅法，不行善、不行不善，不行世間、不行出世間，不行有罪法、不行無罪法，不行有漏法、不行無漏法，不行有為法、不行無為法，不行修道、不行除斷，不行生死、不行涅槃，不行見法、不行聞法、不行覺法、不行知法，不行施、不行捨、不行戒、不行覆、不行忍、不行善、不行發、不行精進、不行禪、不行三昧、不行慧、不行行、不行知、不行得。梵天，若菩薩如是行者，諸佛則授阿耨

²¹² 麗本：所有；永樂北藏本及龍藏本：有所

²¹³ 麗本：如如如；永樂北藏本及龍藏本：如如

多羅三藐三菩提記。所以者何？諸所有行²¹⁴皆有所是，無所是是菩提；諸所有行皆是分別，無分別是菩提。諸所有行皆是起作，無起作是菩提。諸所有行皆是戲論，無戲論是菩提。是故當知，若菩薩過諸所行則得受記。」

「唯然世尊！受記者有何義？」

佛言：「離諸法二相故²¹⁵是受記義，不分別生滅是²¹⁶受記義，離身、口、意業相是受記義。梵天，我念過去有劫名善²¹⁷見，我於此劫供養七十二那由他佛，是諸如來不見授記。又過是劫，劫名善化，我於此劫供養二十二億諸佛²¹⁸，是諸如來亦不見授記。又過是劫，劫名梵歎，我於此劫供養萬八千佛，是諸如來亦不見授記。又過是劫，劫名無咎，我於此劫供養三萬二千佛，是諸如來亦不見授記。又過是劫，劫名莊嚴，我於此劫供養四百四十萬佛，我皆以一切供養之具而供養之，是諸如來亦不見授記。梵天，我於往昔供養諸佛，恭敬、尊重、讚歎，淨修梵行，一切布施、一切持戒及行頭陀，離於瞋恚，忍辱慈心，

²¹⁴ 麗本：諸所有行皆是取相，無相、無分別則是菩提；永樂北藏本及龍藏本：諸所有行

²¹⁵ 麗本：相；永樂北藏本及龍藏本：相故

²¹⁶ 麗本：道是；永樂北藏本及龍藏本：是

²¹⁷ 麗本：慧；永樂北藏本及龍藏本：善

²¹⁸ 麗本：佛；永樂北藏本及龍藏本：諸佛

如所說行勤修精進，一切所聞皆能受持，獨處遠離入諸禪定，隨所聞慧讀²¹⁹誦思問，是諸如來亦不見授記。何以故？依止所行故。以是當知，若諸菩薩出過一切諸行則得受記。我若以一劫、若減一劫，說是諸佛名號不可得盡。

「梵天，我於是後見燃燈佛，即得無生法忍。佛時授我記言：『汝於來世當得作佛，號釋迦牟尼如來、應供、正遍知。』我爾時出過一切諸行，具足六波羅蜜。所以者何？若菩薩能捨諸相，名為檀波羅蜜；能滅諸受²²⁰持，名為尸羅波羅蜜；不為六塵所傷，名為羸提波羅蜜；離諸所行，名為毗梨耶波羅蜜；不憶念一切法，名為禪波羅蜜；能忍諸法無生性，名為般若波羅蜜。我於燃燈佛所，具足如是六波羅蜜。

薩婆若品第十一²²¹

「梵天，我從初發菩提心已來所作布施，於此五華布施，百分不及一，百千分、百千萬億分，乃至算數譬喻所不能及。我從初發心已來，受戒、持戒、行頭陀，於此常滅戒，百分不及一，乃至

²¹⁹ 麗本：讚；永樂北藏本及龍藏本：

²²⁰ 麗本：所受；永樂北藏本及龍藏本：受

²²¹ 麗本：不分品，注曰：丹有菩薩授記品第二十五幅梵天上有薩婆若品第十一；永樂北藏本及龍藏本：菩薩受記品第十

算數譬喻所不能及。我從初發心已來柔和忍辱，於畢竟忍法，百分不及一，乃至算數譬喻所不能及。我從初發心已來發勤精進，於²²²不取不捨精進，百分不及一，乃至算數譬喻所不能及。我從初發心已來禪定獨處，於此無住禪定，百分不及一，乃至算數譬喻所不能及。我從初發心已來思惟籌量智慧，於此無戲論智慧，百分不及一，百千分百千萬億分，乃至算數譬喻所不能及。梵天，是故當知，我爾時得具足六波羅蜜。」

「世尊！云何名具足六波羅蜜？」

「梵天，若不念施、不依止戒、不分別忍、不取精進、不住禪定、不二於慧，是名具足六波羅蜜。」

又問：「具足六波羅蜜已，能滿足何法？」

佛言：「具足六波羅蜜已，能滿足薩婆若。」

「世尊！云何具足六波羅蜜已，能滿足薩婆若？」

「梵天，布施平等即是薩婆若平等；持戒平等即是薩婆若平等；忍辱平等即是薩婆若平等；精進平等即是薩婆若平等；禪定平等即是薩婆若平等；智慧平等即是薩婆若平等；以是平等一

²²² 麗本：於此；永樂北藏本及龍藏本：於

切法，名為薩婆若。又，梵天，滿²²³足布施相、持戒相、忍辱相、精進相、禪定相、智慧相，是名薩婆若。梵天，如是滿²²⁴足六波羅蜜能滿足薩婆若。」

「世尊！云何當知滿足薩婆若？」

「梵天，若不受眼、不受色、不受耳、不受聲、不受鼻、不受香、不受舌、不受味、不受身、不受觸、不受意、不受法，若不受是內外入²²⁵，名為滿足薩婆若。我得如是滿足薩婆若，於眼無所著，於色、耳、聲、鼻、香、舌、味、身、觸、意、法無所著，是故如來名為無礙知見薩婆若。梵天，薩婆若於法無所受。何以故？以無用故。無用即是無所有義。無所有²²⁶即是空，如虛空義、同虛空相是薩婆若，是故於法無所受。梵天，譬如一切所作皆因虛空，而虛空無所依；如是諸智慧皆從薩婆若出，而薩婆若無所依。」

梵天白佛言：「世尊²²⁷所說薩婆若薩婆若者，為何謂也？」

「梵天，一切所行是智為真智²²⁸，非諸聲聞、

²²³ 麗本：具；永樂北藏本及龍藏本：滿

²²⁴ 麗本：具；永樂北藏本及龍藏本：滿

²²⁵ 麗本：十二入；永樂北藏本及龍藏本：入

²²⁶ 麗本：有義；永樂北藏本及龍藏本：有

²²⁷ 麗本：世尊！世尊；永樂北藏本及龍藏本：世尊

²²⁸ 麗本：真；永樂北藏本及龍藏本：真智

辟支佛所及故，名薩婆若。諸有所行皆能成就故，名薩婆若。能破一切所念戲論故，名薩婆若。諸所教勅、諸所防制，如此眾生所行之法，皆從中出故，名為²²⁹薩婆若。得諸聖智，若學智、若無學智、若辟支佛智，皆從中出故，名為²³⁰薩婆若。正行故，名為²³¹薩婆若。能分別一切藥故，名薩婆若。能滅一切眾生病故，名薩婆若。能除一切煩惱習氣故，名薩婆若。常在定故，名薩婆若。一切法中無疑故，名薩婆若。一切世間、出世間智慧皆從中出故，名薩婆若。善知一切智慧方便相故，名薩婆若。」

爾時，思益梵天白佛言：「未曾有也！世尊！諸佛如來智慧甚深，心無所緣而知一切眾生心、心所行。世尊！薩婆若得²³²如是無量功德，其誰善男子、善女人不發阿耨多羅三藐三菩提心？」

於是，網明菩薩白佛言：「世尊！若有菩薩希²³³望功德利益²³⁴而發菩提心者，不名發大乘也。所以者何？一切法無功德利，以無對處故。世尊！菩薩摩訶薩不應為功德利故發菩提心，但為大悲

²²⁹ 麗本：名；永樂北藏本及龍藏本：名為

²³⁰ 麗本：名；永樂北藏本及龍藏本：名為

²³¹ 麗本：名；永樂北藏本及龍藏本：名為

²³² 麗本：有；永樂北藏本及龍藏本：得

²³³ 麗本：悌；永樂北藏本及龍藏本：希

²³⁴ 麗本：利；永樂北藏本及龍藏本：利益

心故、滅眾生諸苦惱故、不自憂苦故、生諸善法故、解脫諸邪見故、滅除諸病故、捨我所貪著故、不觀憎愛故、不沒世法故、厭患有為故、安住涅槃故發菩提心。世尊！菩薩不應於眾生求其恩報，亦不應觀作與不作，又於苦樂心不傾動。世尊！何謂菩薩家清淨？」

佛言：「善男子，菩薩若生轉輪聖王家，不名家清淨；若生帝釋中、若生梵王中，亦不名家清淨；在所生處，乃至畜生，自不退失善根，亦令眾生生諸善根，是名菩薩家清淨。又，網明，慈是菩薩家，心平等故；悲是菩薩家，深心念故；喜是菩薩家，生法喜故；捨是菩薩家，離貪著故；不捨菩提是菩薩家，不貪聲聞、辟支佛地故。」

思益梵天所問經卷第二

思益梵天所問經卷第三

姚秦三藏法師鳩摩羅什譯²³⁵

菩薩無二品第十二²³⁶

爾時，思益梵天白佛言：「世尊！是文殊師利法王子在此大會而無所說。」

佛即告文殊師利：「汝於此²³⁷所說法中可少說之。」

文殊師利白佛言：「世尊！佛所得法寧可識不？」

佛言：「不可識也。」

「世尊！是法可說、可演、可論不？」

佛言：「不可說、不可演、不可論。」

「世尊！若是法不可說、不可演、不可論者，則不可示也²³⁸。」

爾時，思益梵天謂文殊師利：「汝不為眾生演說法乎？」

文殊師利言：「梵天，法性中有二相耶？」

²³⁵ 麗本：姚秦龜茲國三藏鳩摩羅什譯

²³⁶ 麗本：談論品第七（丹菩薩無二品第十二）；永樂北藏本及龍藏本：菩薩無二品第十二

²³⁷ 麗本：此會；永樂北藏本及龍藏本：此

²³⁸ 麗本：示；永樂北藏本及龍藏本：示也

梵天言：「無也。」

文殊師利言：「一切法不入法性耶？」

梵天言：「然！」

文殊師利言：「若法性是不二相，一切法入法性中，云何當為眾生說法？」

梵天言：「頗有說法亦無二相²³⁹耶？」

文殊師利言：「若決定得說者、聽者，可有說法亦無有二。」

「文殊師利，如來不說法耶？」

文殊師利言：「佛雖說法不以二相。何以故？如來性無二故，雖有所說而無二也。」

梵天言：「若一切法無二，其誰為二？」

文殊師利言：「凡夫²⁴⁰貪著我故，分別二耳；不二者，終²⁴¹不為二。雖種種分別為二，然其實際無有二相。」

梵天言：「云何識無二法？」

文殊師利言：「若無二可識，則非無二。所以者何？無二相者，不可識也。梵天，二即是識業，不可識法，佛所說也。是法不爾如所說，何以故？是法無文字故。」

²³⁹ 麗本：二；永樂北藏本及龍藏本：二相

²⁴⁰ 麗本：起；永樂北藏本及龍藏本：夫

²⁴¹ 麗本：法性終；永樂北藏本及龍藏本：終

「文殊師利，佛所說法終何所至？」

文殊師利言：「如來²⁴²說法至無所至。」

梵天言：「佛所說法不至涅槃耶？」

文殊師利言：「涅槃²⁴³可得至耶？」

梵天言：「涅槃無來處、無至處。」

文殊師利言：「如是！佛所說法至無所至。」

梵天言：「是法誰聽？」

答言：「如所說。」

梵天言：「云何如所說？」

答言：「如不識不聞。」

梵天言：「誰能聽如來如是法？」

答言：「不漏六塵者。」

梵天言：「誰能知是法？」

答言：「無識、無分別、無諍訟者。」

梵天言：「云何比丘名多諍訟？」

答言：「是好、是惡，此名諍訟；是理、是非理，此名諍訟；是垢、是淨，此名諍訟；是善、是不善，此名諍訟；是戒²⁴⁴、是毀戒，此名諍訟；是應作、是不應作，此名諍訟；以是法得道、以是法得果，此名諍訟。梵天，若於法中有高下心，

²⁴² 麗本：佛所；永樂北藏本及龍藏本：如來

²⁴³ 麗本：涅槃中；永樂北藏本及龍藏本：涅槃

²⁴⁴ 麗本：持戒；永樂北藏本及龍藏本：戒

貪著所²⁴⁵受，皆是諍訟，佛所說法無有諍訟。梵天，樂戲論者，無不諍訟；樂諍訟者，無沙門法；樂沙門法者，無有妄想貪著。」

梵天言：「云何比丘隨佛語、隨佛教？」

答言：「若比丘稱讚、毀辱其心不動，是名隨佛教；若比丘不隨文字語言，是名隨佛語。又比丘滅一切諸相，是名隨佛教；不違於義，是名隨佛語。若比丘守護於法，是名隨佛教；若不²⁴⁶違佛語，是名隨佛語。」

梵天言：「云何比丘能守護法？」

答言：「若比丘不逆平等、不壞法性，是名能守護法。」

梵天言：「云何比丘親近於佛？」

答言：「若比丘於諸法中，不見有法若近若遠，是名親近於佛。」

梵天言：「云何比丘給侍於佛？」

答言：「若比丘身、口、意無所作，是名給侍於佛。」

梵天言：「誰能供養佛？」

答言：「不²⁴⁷起福業，不起不²⁴⁸動業者。」

²⁴⁵ 麗本：取；永樂北藏本及龍藏本：所

²⁴⁶ 麗本：不；永樂北藏本及龍藏本：若不

²⁴⁷ 麗本：若不；永樂北藏本及龍藏本：不

²⁴⁸ 麗本：無；永樂北藏本及龍藏本：不

梵天言：「誰能見佛？」

答言：「若不著肉眼、不著天眼、不著慧眼，是名能見佛。」

梵天言：「誰能見法？」

答言：「不逆諸因緣法者。」

梵天言：「誰能順見諸因緣法？」

答言：「不起平等，不見平等所生相者。」

梵天言：「誰得真智？」

答言：「不生不滅諸漏者。」

梵天言：「誰能隨學如來？」

答言：「不起、不受、不取、不捨諸法者。」

梵天言：「誰名正行？」

答言：「不墮三界者。」

梵天言：「誰為善人？」

答言：「不受後身者。」

梵天言：「誰為樂人？」

答言：「無我、無我所者。」

梵天言：「誰為得解脫者²⁴⁹？」

答言：「不壞縛者。」

梵天言：「誰為得度？」

答言：「不住生死、不住涅槃者。」

²⁴⁹ 麗本：脫；永樂北藏本及龍藏本：解脫者

梵天言：「漏盡比丘盡何事耶？」

答言：「若有所盡，不名漏盡。知諸漏空相，隨如是知，名為漏盡。」

梵天言：「誰為實語？」

答言：「離諸言論道者。」

梵天言：「誰為入道？」

答言：「凡夫有入道聖²⁵⁰行者，知一切有為法無所從來、無所從去，則無²⁵¹入道。」

梵天言：「誰能見聖諦？」

答言：「無有見聖諦者。所以者何？隨所有見皆為虛妄，無所見者乃名見諦。」

梵天言：「不見何法名為見諦？」

答言：「不見一切諸見名為見諦。」

梵天言：「是諦當於何求？」

答言：「當於四顛倒中求。」

梵天言：「何故作如是說？」

答言：「求四顛倒，不得淨、不得常、不得樂、不得我；若不得淨是即不淨；若不得常是即無常；若不得樂是即為苦；若不得我是即無我。梵天，一切法空、無我，是為聖諦。若能如是求

²⁵⁰ 麗本：聖道；永樂北藏本及龍藏本：道聖

²⁵¹ 麗本：為；永樂北藏本及龍藏本：無

諦，是人不見苦、不斷集、不證滅、不修道。」

梵天言：「云何名修道？」

答言：「若不分別是法、是非法，離於二相，名為修道；以是道求一切法不得，是名為道。是道不令人離生死至涅槃。所以者何？不離不至乃名聖道。」

爾時，有摩訶羅梵天子，名曰等行，問文殊師利：「何謂優婆塞歸依佛、歸依法、歸依僧？」

答言：「若優²⁵²婆塞不起二見：不起我見、不起彼見——不起我見、不起佛見，不起我見、不起法見，不起我見、不起僧見，是名歸依佛、歸依法、歸依僧。又優婆塞不以色見佛，不以受、想、行、識見佛，是名歸依佛。若優²⁵³婆塞於法無所分別，亦不行非法，是名歸依法。若優婆塞不離有為法見無為法，不離無為法見有為法，是名歸依僧。又優婆塞不得佛、不得法、不得僧，是名歸依佛、歸依法、歸依僧。」

爾時，等行菩薩問文殊師利言：「是諸菩薩發菩提心者，為何所趣²⁵⁴？」

答言²⁵⁵：「趣於虛空。所以者何？阿耨多羅

²⁵² 麗本：優；永樂北藏本及龍藏本：若優

²⁵³ 麗本：優；永樂北藏本及龍藏本：若優

²⁵⁴ 麗本：趣何所；永樂北藏本及龍藏本：何所趣

²⁵⁵ 麗本：曰；永樂北藏本及龍藏本：言

三藐三菩提同虛空故。」

等行言：「云何菩薩名發阿耨多羅三藐三菩提心？」

答言：「若菩薩知一切發非發，一切法非法，一切眾生非眾生，是名菩薩發阿耨多羅三藐三菩提心。」

名字義品第十三²⁵⁶

爾時，等行菩薩白佛言：「世尊！所言菩薩菩薩者，為何謂耶？」

佛言：「善男子，若菩薩於邪定眾生發大悲心，於正定眾生不見殊異，故言菩薩。所以者何？菩薩不為正定眾生、不為不定眾生故發心，但為度邪定眾生故而起大悲，發阿耨多羅三藐三菩提心，故名²⁵⁷菩薩。」

²⁵⁸爾時，菩提菩薩白佛言：「世尊！我²⁵⁹亦樂說所以為菩薩。」

佛言：「若樂說者便說²⁶⁰！」

菩提菩薩言：「譬如男子、女人受一日戒無

²⁵⁶ 麗本不分品；永樂北藏本及龍藏本：名字義品第十三

²⁵⁷ 麗本：言；永樂北藏本及龍藏本：名

²⁵⁸ 麗本：（爾時，等行菩薩白佛言下，丹為名字義品第十三）

²⁵⁹ 麗本：我等；永樂北藏本及龍藏本：我

²⁶⁰ 麗本：便說；永樂北藏本及龍藏本：若樂說者，便說

毀無缺，若菩薩如是從初發心乃至成佛，於其中間常修淨行，是名菩薩。」

堅意菩薩言：「若菩薩成就深固慈心，是名菩薩。」

度眾生菩薩言：「譬如橋船度²⁶¹人不倦無有分別，若心如是，是名菩薩。」

斷惡道菩薩言：「若菩薩於諸佛國投足之處，即時一切惡道皆滅，是名菩薩。」

觀世音菩薩言：「若菩薩，眾生見者，即時畢²⁶²定於阿耨多羅三藐三菩提；又稱其名²⁶³，得免眾苦，是名菩薩。」

得大勢菩薩言：「若菩薩所投足處，震動三千大千世界及魔宮殿，是名菩薩。」

無疲倦菩薩言：「若恒河沙等劫為一日一夜，以是三十日為一月，十二月為一²⁶⁴歲；以是歲數，若過百千萬億劫得值一佛；如是於恒河沙等佛所，行諸梵行修集功德，然後受阿耨多羅三藐三菩提記，心不休息無有疲倦，是名菩薩。」

導師菩薩言：「若菩薩於墮邪道眾生生大悲心，令入正道不求恩報，是名菩薩。」

²⁶¹ 麗本：渡；永樂北藏本及龍藏本：度

²⁶² 麗本：畢；永樂北藏本及龍藏本：必；校勘：畢

²⁶³ 麗本：名者；永樂北藏本及龍藏本：名

²⁶⁴ 麗本：為；永樂北藏本及龍藏本：為一

須彌山菩薩言：「若菩薩於一切法無所分別，如須彌山一於²⁶⁵眾色，是名菩薩。」

那羅延菩薩言：「若菩薩不為一切煩惱所壞，是名菩薩。」

心力菩薩言：「若菩薩以心思惟一切諸法無有錯謬，是名菩薩。」

師子遊步自在菩薩言：「若菩薩於諸論中不怖不畏得深法忍，能使一切外道怖畏，是名菩薩。」

不可思議菩薩言：「若菩薩知心相不可思議，無所思惟分別，是名菩薩。」

善寂天子言：「若菩薩能於一切天宮中生而無所染，亦不得是無染之法，是名菩薩。」

實語菩薩言：「若菩薩有所發言常以真實，乃至夢中亦無妄語，是名菩薩。」

喜見菩薩言：「若菩薩能見一切色皆是佛色，是名菩薩。」

常慘菩薩言：「若菩薩見墮生死眾生，其心不樂世間諸樂，欲自度己身亦度眾生，是名菩薩。」

心無礙菩薩言：「若菩薩於一切煩惱眾魔而不瞋礙，是名菩薩。」

²⁶⁵ 麗本：於；永樂北藏本及龍藏本：切；校勘：於

常喜根菩薩言：「若菩薩常以喜²⁶⁶根自滿其願亦滿他願，所作皆辦，是名菩薩。」

散疑女菩薩言：「若菩薩於一切法中不生疑悔，是名菩薩。」

師子童女菩薩言：「若菩薩無男法、無女法而現種種色身，為成就眾生故，是名菩薩。」

寶女菩薩言：「若菩薩於諸寶中不生愛樂，但樂三寶，是名菩薩。」

毗舍佉達多優婆夷言：「若菩薩有所得者則無菩提，若不得一切法、不生一切法、不滅一切法，是名菩薩。」

跋陀婆羅賢²⁶⁷士言：「若菩薩，眾生聞其名者，畢定於阿耨多羅三藐三菩提，是名菩薩。」

寶月童子言：「若菩薩常修童子梵行，乃至不以心念五欲，何況身受？是名菩薩。」

忉利天子曼陀羅華香菩薩言：「若菩薩持戒熏心，常流諸善法香，不流餘香，是名菩薩。」

作喜菩薩言：「若菩薩喜樂三法，謂供養佛、演說於²⁶⁸法、教化眾生，是名菩薩。」

思益梵天言：「若菩薩所見之法皆是佛法，

²⁶⁶ 麗本：善；永樂北藏本及龍藏本：喜

²⁶⁷ 麗本：居；永樂北藏本及龍藏本：賢

²⁶⁸ 麗本：說；永樂北藏本及龍藏本：說於

是名菩薩。」

彌勒菩薩言：「若菩薩，眾生見者，即得慈心三昧，是名菩薩。」

文殊師利法王子言：「若菩薩雖說諸法而不起法想²⁶⁹、不起非法想²⁷⁰，是名菩薩。」

網明菩薩言：「若菩薩光明能滅一切眾生煩惱，是名菩薩。」

普華菩薩言：「若菩薩見諸如來滿十方世界，如林華敷，是名菩薩。」

如是諸菩薩各各隨所樂說已。

爾時，佛告等行菩薩言²⁷¹：「若菩薩能代一切眾生受諸苦惱，亦復能捨一切福事與諸眾生，是名菩薩。」

論寂品第十四²⁷²

爾時，思益梵天問等行菩薩言：「善男子，汝今以何行為行？」

答言：「我已²⁷³ 隨一切有為法眾生行為行。」

又問：「隨一切有為法眾生以何為行？」

²⁶⁹ 麗本：相；永樂北藏本及龍藏本：想

²⁷⁰ 麗本：相；永樂北藏本及龍藏本：想

²⁷¹ 麗本：薩；永樂北藏本及龍藏本：薩言

²⁷² 麗本：論寂品第八；永樂北藏本及龍藏本：論寂品第十四

²⁷³ 麗本：以；永樂北藏本及龍藏本：已

答言：「諸佛所行，是隨一切有為法眾生行也。」

又問：「諸佛以何為行？」

答言：「諸佛以第一義空為行。」

又問：「凡夫所行，諸佛亦以是行，有何差別？」

等行言：「汝欲令空中有差別耶？」

答言：「不也！」

等行言：「如來不說一切法空耶？」

答言：「然！」

「是故，梵天，一切法無有差別，是諸行相亦復如是。所以者何？如來不說諸法有差別也。」

爾時，思益梵天問文殊師利言：「所言行處²⁷⁴行，為何謂也²⁷⁵？」

答言：「於諸行中有四梵行，是名行處行。若人離四梵行，不名行處行；能行四梵行，是名行處行。梵天，若人成就四梵行，雖於空閑曠野中行，是名行處行；若不成就四梵行，雖於樓殿堂閣、金銀床榻、妙好被褥於此中行，不名行處行，亦復不能善知行處相。」

²⁷⁴ 麗本：行；永樂北藏本及龍藏本：行處

²⁷⁵ 麗本：耶；永樂北藏本及龍藏本：也

又問：「菩薩以何行知見清淨？」

答言：「於諸行中能淨我見。」

又問：「若得我實性，即得實知見耶？」

答言：「然！若見我實性，即是實知見。譬如國王典金藏人，因已出用，知餘在者。如是，因知我實性故，得實知見。」

又問：「云何得我實性？」

答言：「若得無我法。所以者何？我畢竟無根本、無決定故。若能如是知者，是名得我實性。」

又問：「如我解文殊師利所說義，以見我故即是見佛。所以者何？我性即是佛性。文殊師利，誰能見佛？」

答言：「不壞我見者。所以者何？我見即是法見，以法見能見佛。」

又問：「頗有無所行名為正行耶？」

答言：「有！若不行一切有為法，是名正行。」

又問：「云何行名為正行？」

答言：「若不為見故行，不為斷、不為證、不為修故行，是名正行。」

又問：「慧眼為見何法？」

答言：「若有所見，不名慧眼。慧眼不見有為法、不見無為法。所以者何？有為法皆虛妄分

別，無虛妄分別是名慧眼；無為法空無所有，過諸眼道，是故慧眼亦不見無為法。」

又問：「頗有因緣，正行比丘不得道果²⁷⁶？」

答言：「有！正行中，無道、無果、無行、無得、無有得果差別。梵天，無所得故乃名為得。若有所得，當知是為增上慢人；正行者無增上慢，無增上慢則無行無得。」

又問：「得何法故名為得道？」

答²⁷⁷言：「若法不自生、不他生、亦不眾緣生，從本已來常無有生，得是法故說名得道。」

又問：「若法不生，為何所得？」

答言：「若知法不生即名為得，是故佛說『若見諸有為法不生相，即入正位。』」

又問：「云何名²⁷⁸正位？」

答言：「我及涅槃等不作二，是名正位。又行平等故，名為正位。以平等出諸苦惱故，名²⁷⁹正位。入了義中故，名²⁸⁰正位。除一切憶念故，名²⁸¹正位。」

爾時，世尊讚文殊師利言：「善哉！善哉！」

²⁷⁶ 麗本：果耶；永樂北藏本及龍藏本：果

²⁷⁷ 麗本：文殊師利；永樂北藏本及龍藏本：答

²⁷⁸ 麗本：何等名為；永樂北藏本及龍藏本：云何名

²⁷⁹ 麗本：名為；永樂北藏本及龍藏本：名

²⁸⁰ 麗本：名為；永樂北藏本及龍藏本：名

²⁸¹ 麗本：名為；永樂北藏本及龍藏本：名

快說此言，誠如所說。」

說是法時，七千比丘不受諸法，漏盡，心得解脫。三萬二千諸天遠塵離垢，得法眼淨。十千人離欲得定，二百人發阿耨多羅三藐三菩提心，五百菩薩得無生法忍。

爾時，思益梵天白佛言：「世尊！是文殊師利法王子能作佛事大饒益眾生。」

文殊師利言：「佛出於世，不為益法故出，不為損法故出。」

梵天言：「佛豈不滅度無量眾生？仁者亦不利益無量眾生耶？」

文殊師利言：「汝欲於無眾生中得眾生耶？」

答言：「不也！」

「梵天，汝欲得眾生決定相耶？」

答言：「不也！」

「梵天，汝欲得諸佛有出生相於世間耶？」

答言：「不也！」

「梵天，何等是眾生為佛所滅度者？」

梵天言：「如仁者²⁸²所說義，無生死，無涅槃。」

文殊師利言：「如是！諸佛世尊不得生死、

²⁸² 麗本：仁；永樂北藏本及龍藏本：仁者

不得涅槃；佛諸弟子得解脫者，亦不得生死、不得涅槃。所以者何？是涅槃、是生死，但假名字有言說耳！實無生死往來、滅度²⁸³涅槃。」

又問：「誰能信是法耶？」

答言：「於諸法中無貪著者。」

又問：「若貪著者，於何貪著？」

答言：「貪著者貪著²⁸⁴虛妄。梵天，若貪著是實者，終無增上慢²⁸⁵；以貪著虛妄故，行者知之而不貪著；若不貪著則無有流；若無有流則無往來生死；若無往來生死是則滅度。」

又問：「何故說言滅度？」

答言：「滅度者，名為眾緣不和合。若無明不和合諸行因緣，則不起諸行；若不起諸行是名為滅，不起相是畢竟滅。得是道故，則無生處，如是名為四聖諦。」

²⁸³ 麗本：盡得；永樂北藏本及龍藏本：度

²⁸⁴ 麗本：貪著；永樂北藏本及龍藏本：貪著者貪著

²⁸⁵ 麗本：慢人；永樂北藏本及龍藏本：慢

如來二事品第十五²⁸⁶

²⁸⁷爾時，等行菩薩謂文殊師利²⁸⁸：「如汝所說，皆為真實？」

答言：「一切言說皆為真實。」

又問：「虛妄言說亦真實耶？」

答言：「如是！所以者何？是諸言說皆為虛妄，無處無方。若法皆虛妄，無處無方，是故一切言說皆是真實。善男子，提婆達語、如來語無異無別。所以者何？一切言說，皆是如來言說，不出如故。一切言說有所說事，皆以無所說故得有所說，是以²⁸⁹一切言說皆平等²⁹⁰，文字同故，文字無念故，文字空故。」

等行言：「如來不說凡夫語言、賢聖語言耶？」

文殊師利言：「然！以文字說凡夫語言，亦以文字說賢聖語言。如是，善男子，諸文字有分別，是凡夫語言²⁹¹？是賢聖語言²⁹²耶？」

等行言²⁹³：「不也！」

²⁸⁶ 麗本不分品；永樂北藏本及龍藏本：如來二事品第十五

²⁸⁷ 麗本：（爾時下，丹為如來二事品第五）

²⁸⁸ 麗本：利言；永樂北藏本及龍藏本：利

²⁸⁹ 麗本：故；永樂北藏本及龍藏本：以

²⁹⁰ 麗本：等；永樂北藏本及龍藏本：平等

²⁹¹ 麗本：言說；永樂北藏本及龍藏本：語言

²⁹² 麗本：言說；永樂北藏本及龍藏本：語言

²⁹³ 麗本：答言；永樂北藏本及龍藏本：言

文殊師利言：「如諸文字無分別，一切賢聖亦無分別，是故賢聖無有言說。所以者何？賢聖不以文字相、不以眾生相、不以法相有所說也。譬諸²⁹⁴鍾鼓眾緣和合而有音聲，是諸鍾鼓亦無分別；如是諸賢聖善知眾因緣故，於諸言說無貪無礙。」

等行言：「如佛所說：『汝等集會當行二事，若說法 若聖默然。』何謂說法？何謂聖默然？」

答言：「若說法，不違佛、不違法、不違僧，是名說法。若知法即是佛，離相即是法，無為即是僧，是名聖默然。又，善男子，因四念處有所說，名為說法；於一切法無所憶念，名聖默然。因四正勤有所說，名為說法；以諸法等，不作等，不作不等，名聖默然。因四如意足有所說，名為說法；若不起身心，名聖默然。因五根、五力有所說，名為說法；若不隨他語有所信，為不取不捨故分別諸法，一心安住，無念念中解一切法常定性，斷一切戲論慧，名聖默然。因七菩提分有所說，名為說法；若常行捨心，無所分別，無增無減，名聖默然。因八聖道分有所說，名為說法；若知說法相如椽喻，不依法，不依非法，名聖默

²⁹⁴ 麗本：如；永樂北藏本及龍藏本：諸

然。善男子，於是三十七助道法若能開解演說，名為說法；若身證是法，亦不離身見法，亦不離法見身，於是觀中不見二相，不見不二相，如是現前知見而亦不見，名聖默然。又，善男子，若不妄想著我，不妄想著彼，不妄想著法有所說，名為說法；若至不可說相，能離一切言說音聲，得不動處，入離相心，名聖默然。又，善男子，若知一切眾生諸根利鈍而教誨之，名為說法；常入於定心不散亂，名聖默然。」

等行言：「如我解文殊師利所說義，一切聲聞、辟支佛無有說法，亦無聖默然。所以者何？是人不能²⁹⁵了知一切眾生諸根利鈍，亦復不能常在於定。文殊師利，若有真實問：『何等是世間說法者？何等是世間聖默然者？』則當為說諸佛是也。所以者何？諸佛善能分別一切眾生諸根利鈍，亦常在定。」

佛告文殊師利：「如是，如是！如等行所說，唯諸如來²⁹⁶有此二法。」

爾時，須菩提白佛言：「世尊！我親從佛聞：『汝等集會當行二事，若說法、若聖默然。』世

²⁹⁵ 麗本：不；永樂北藏本及龍藏本：是人不能

²⁹⁶ 麗本：佛如來；永樂北藏本及龍藏本：如來

尊！若聲聞不能行者，云何如來勅諸比丘行此二事？」

佛告須菩提：「於汝意云何？若聲聞不從他聞，能說法、能聖默然不？」

須菩提言：「不也。」

「須菩提，是故當知一切聲聞、辟支佛無有說法、無聖默然。」

爾時，文殊師利謂須菩提²⁹⁷：「如來²⁹⁸了知眾生八萬四千行。汝於此中有智慧，能隨其所應為說法不？」

答言：「不也！」

「今須菩提能入觀一切眾生心三昧，住是三昧，通達一切眾生心、心所行，自心、他心無所妨礙不？」

答言：「不也！」

文殊師利言：「須菩提²⁹⁹，如來於眾生八萬四千行，隨其所應為說法藥。又常住定平等相中心不動搖，而通達一切眾生心心所行。須菩提，是故當知，一切聲聞、辟支佛不及此事。須菩提，或有眾生多婬欲者，以觀淨得解脫，不以不淨；

²⁹⁷ 麗本：須菩提言；永樂北藏本及龍藏本：須菩提

²⁹⁸ 麗本：長老須菩提！如來；永樂北藏本及龍藏本：如來

²⁹⁹ 麗本：「須菩提；永樂北藏本及龍藏本：文殊師利言：「須菩提

唯佛能知。或有眾生多瞋恚者，以觀過得解脫，不以慈心；唯佛能知。或有眾生多愚癡者，以不共語得解脫，不以說法；唯佛能知。或有眾生等分行者，不以觀淨、不以不淨、不以觀過、不以慈心、不以不共語、不以說法得解脫者，隨其根性以諸法平等而為說法使得解脫；唯佛能知。是故如來於諸說法人中為最第一，禪定人中亦最第一。」

爾時，須菩提問文殊師利：「若聲聞、辟支佛不能如是說法，不能如是聖默然者，諸菩薩有成就如是功德，能說法、能聖默然不？」

答言：「唯佛當知！」

於是，佛告須菩提：「有三昧名入一切語言心不散亂，若菩薩成就是³⁰⁰三昧皆得是功德。」

爾時，文殊師利謂等行菩薩：「善男子，為眾生八萬四千行故，說八萬四千法藏，名為說法；常在一切滅受想定³⁰¹中，名聖默然。善男子，我若一劫、若減一劫演³⁰²說是義，是名說法相、是聖默然相，猶不能盡。」

於是，佛告等行菩薩：「善男子，乃往過去

³⁰⁰ 麗本：此；永樂北藏本及龍藏本：是

³⁰¹ 麗本：行定；永樂北藏本及龍藏本：定

³⁰² 麗本：能；永樂北藏本及龍藏本：演

無量無邊不可思議阿僧祇劫，時世有佛，號曰普光，劫曰名聞，國名喜³⁰³見。彼國嚴淨、豐樂、安隱，天人熾盛，其地皆以眾寶莊嚴，柔軟細滑，生寶蓮華，一切香樹充滿其中，常出妙香。善男子，喜³⁰⁴見國土有四百億四天下，一一天下縱廣八萬四千由旬。其中諸城縱廣一由旬，皆以眾寶校飾。一一城者，有二³⁰⁵萬五千聚落村邑而圍遶之。一一聚落、村邑無量百千人眾充滿其中。彼時人民所見色像心皆欣³⁰⁶悅，無可憎惡，亦悉皆得念佛三昧，是以國土名曰喜³⁰⁷見。若他方世界諸來菩薩皆得快樂，餘國不爾。善男子，其普光佛以三乘法為弟子說，亦多樂說如是法言³⁰⁸：『汝等比丘當行二事：若說法、若聖默然。』

「善男子，爾時，上方醫王佛土有二菩薩：一名無盡意，二名益意，來詣普光佛所。頭面禮佛足³⁰⁹，右遶三匝，恭敬合掌，却住一面。時，普光佛為二菩薩廣說淨明三昧：『所以名曰淨明三昧者，若菩薩入是三昧，即得解脫一切諸相及

³⁰³ 麗本：喜；永樂北藏本及龍藏本：喜

³⁰⁴ 麗本：喜；永樂北藏本及龍藏本：喜

³⁰⁵ 麗本：一；永樂北藏本及龍藏本：二

³⁰⁶ 麗本：喜；永樂北藏本及龍藏本：欣

³⁰⁷ 麗本：喜；永樂北藏本及龍藏本：喜

³⁰⁸ 麗本：音；永樂北藏本及龍藏本：言

³⁰⁹ 麗本：足；永樂北藏本及龍藏本：佛足

煩惱著，亦於一切佛法得淨光明，是故名為淨明三昧。又前際一切法淨、後際一切法淨、現在一切法淨，是三世畢竟淨，無能令不淨，性常淨故，是以說一切諸法性常清淨。何謂諸法性淨？謂一切法空相，離有所得故；一切法無相相，離憶想分別故；一切法無作相，不取不捨，無求無願，畢竟離自性故，是名性常清淨。以是常淨相，知生死性即是涅槃性³¹⁰，涅槃性即是一切法性，是故說心性常清淨。善男子，譬如虛空，若受垢污無有是處；心性亦如是，若有垢污無有是處。又如虛空，雖為烟塵雲霧覆暄³¹¹，不明不淨，而不能染污虛空之性；設染污者，不可復淨，以虛空實不染污故，還見清淨。凡夫心亦如是，雖邪憶念起諸煩惱，然其心性³¹²不可垢污；設垢污者，不可復淨，以心相實不可³¹³垢污，性常明淨。是故心得解脫。善男子，是名入淨明三昧門。』彼二菩薩聞是三昧，於諸法中得不可思議法光明。

「爾時，無盡意菩薩白普光如來³¹⁴言：『世尊！我等已聞入淨明三昧³¹⁵。當以何行，行此法

³¹⁰ 麗本：涅槃；永樂北藏本及龍藏本：涅槃性

³¹¹ 麗本：翳；永樂北藏本及龍藏本：暄

³¹² 麗本：相；永樂北藏本及龍藏本：性

³¹³ 麗本：不；永樂北藏本及龍藏本：不可

³¹⁴ 麗本：佛；永樂北藏本及龍藏本：如來

³¹⁵ 麗本：三昧門；永樂北藏本及龍藏本：三昧

門？』佛告無盡意：『善男子，汝等當行二行：若說法、若聖默然。』時二菩薩從佛受教，頭面禮佛足，遶三匝而出，趣一園林，自以神力化作寶樓於中修行。

「時，有梵天名曰妙光，與七萬二千梵俱，來至其所，頭面禮足，問二菩薩：『善男子，普光如來說言：「汝等比丘集會當行二事：若說法、若聖默然。」善男子，何謂說法？何謂聖默然？』二菩薩言：『汝今善聽，我當少說，唯有如來乃通達耳！』於是二菩薩以二句義為諸梵眾廣分別說。時，七萬二千梵皆得無生法忍，妙光梵天得普光明三昧。

「是二菩薩於七萬六千歲以無礙辯才³¹⁶答其所問，不懈不息分別二句，互相問答而不窮盡。於是普光如來³¹⁷在虛空中作如是言：『善男子，勿於文字言說而起諍訟！凡諸言說，皆空如響，如所問答，亦復³¹⁸如是。汝等二人皆得無礙辯才及無盡陀羅尼，若於一劫、若百劫，說此二句辯不可盡。善男子，佛法是寂滅相第一之義，此中無有文字，不可得說；諸所言說皆無義利。是故

³¹⁶ 麗本：力；永樂北藏本及龍藏本：才

³¹⁷ 麗本：佛；永樂北藏本及龍藏本：如來

³¹⁸ 麗本：亦；永樂北藏本及龍藏本：亦復

汝等當隨此義，勿隨文字。』是二菩薩聞佛教已，默然而止。」

佛告等行：「以是當知，菩薩若以辯才說法，於百千萬劫若過百千萬劫不可窮盡。」

又告等行：「於意云何，彼二菩薩豈異人乎？勿造斯觀！無盡意者今文殊師利是，益意菩薩者今汝身是，妙光梵天者今思益梵天是也³¹⁹。」

³²⁰爾時，等行菩薩白佛言：「未曾有也！世尊！諸佛菩薩³²¹為大饒益，如所說行精進眾生。世尊！其懈怠不能如所³²²說行者，雖值百千萬佛無能為也，當知從勤精進得出菩提。」

得聖道品第十六³²³

爾時，文殊師利謂等行菩薩：「善男子，汝知菩薩云何行名勤精進？」

答言：「若菩薩能得聖道，名勤精進。」

又問：「云何行能得聖道？」

答言³²⁴：「若於諸法無所分別，如是行者能

³¹⁹ 麗本：是；永樂北藏本及龍藏本：是也

³²⁰ 麗本：仿行品第九（丹無此品，幅末爾時文殊師利下，為得聖道品第十六（夾註幅末當今本紙左十九行））；永樂北藏本及龍藏本无此品

³²¹ 麗本：提；永樂北藏本及龍藏本：薩

³²² 麗本：如；永樂北藏本及龍藏本：如所

³²³ 麗本不分品；永樂北藏本及龍藏本：得聖道品第十六

³²⁴ 麗本：曰；永樂北藏本及龍藏本：言

得聖道。」

又問：「云何名為³²⁵得聖道已？」

答言³²⁶：「若行者於平等中見諸法平等，是名得聖道已。」

又問：「平等可得見耶？」

答言：「不也。所以者何？若平等可見則非平等。」

思益梵天謂文殊師利：「若行者於平等中不見諸法，是名得聖道已。」

文殊師利言：「何故不見？」

思益言：「離二相故不見，不見即是正見。」

又問：「誰能正見世間？」

答言：「不壞世間相者。」

又問：「云何為不壞世間相？」

答言：「色如無別無異，受想行識如無別無異。若行者見五陰平等如相，是名正見世間。」

又問：「何等是世間相？」

答言：「滅盡是世間相。」

又問：「滅盡相復可盡耶？」

答言：「滅盡相者不可盡也。」

³²⁵ 麗本：名；永樂北藏本及龍藏本：名為

³²⁶ 麗本：曰；永樂北藏本及龍藏本：言

又問：「何故說言：『世間是滅盡相』？」

答言：「世間畢竟盡相，是相不可盡。所以者何？已盡者，不復盡也。」

又問：「佛不說一切有為法是盡相耶？」

答言：「世間是盡相，終不可盡。是故，佛說一切有為法是盡相。」

又問：「何等³²⁷數名有為法？」

答言：「以盡相故，名有為法。」

又問：「有為法者為住何所？」

答言：「無為性中住。」

又問：「有為法、無為法有何差別？」

答言：「有為法、無為法，文字言說有差別耳！所以者何？以文字言說，言是有為，是無為。若求有為、無為實相，則無差別，以實相無差別故。」

又問：「何等是諸法實相義？」

答言：「一切法平等無有差別，是諸法實相義。」

又問：「何等為義？」

答言：「以文字說，令人得解，故名為義。所以者何？實相義者，不如文字所說。諸佛雖以

³²⁷ 麗本：故；永樂北藏本及龍藏本：等

文字有所言說，而於實相無所增減。文殊師利，一切言說皆非言說，是故佛語名不可說，諸佛不可以言相說故。」

又問：「云何得說佛相？」

答言：「諸佛如來不可以色身說相，不可以三十二相說相，不可以諸功德法說相。」

又問：「諸佛可離色身、三十二相、諸功德法而說相耶？」

答言：「不也！所以者何？色身如、三十二相如、諸功德法如；諸佛不即是如，亦非³²⁸離如，如是可說佛相，不失如故。」

又問：「諸佛世尊得何等故號名為佛？」

答言：「諸佛世尊通達諸法性相如故，說名為佛³²⁹、正遍知者。」

志大乘品第十七³³⁰

於是，等行菩薩白佛言：「世尊！何謂菩薩發行大乘？」

爾時，世尊以偈答言：

菩薩不壞色 發行菩提心

³²⁸ 麗本：不；永樂北藏本及龍藏本：非

³²⁹ 麗本：志大乘品第十（丹大乘行品第十七）；永樂北藏本及龍藏本：志大乘品第十七

³³⁰ 麗本：如來；永樂北藏本及龍藏本：為佛

知色即菩提 是名行菩提
如色菩提然 等入於如相
不壞諸法性 是名行菩提
不壞諸法性 則為菩提義
是菩提義中 亦無有菩提
正行第一義 是名行菩提
愚於陰界入 而欲求菩提
陰界入即是 離是無菩提
若有諸菩薩 於上中下法
不取亦不捨 是名行菩提
若法及非法 不分別為二
亦不得不二 是名行菩提
若二則有為 非二則無為
離是二邊者 是名行菩提
是人過凡夫 亦不入法位
未得果而聖 是世間福田
行於世間法 處中若³³¹蓮華
遵修最上道 是名行菩提
世間所行處 悉於是中行
世間所貪著 於中得解脫
菩薩無所畏 不沒生死淵

³³¹ 麗本：如；永樂北藏本及龍藏本：若

無憂無疲倦 而行菩提道
斯人能善知 法性真實相
是故不分別 是法是非法
行於佛道時 無法可捨離
亦無法可受 是名菩提相
一切法無相 猶若如虛空
終不作是念 是相是可相
善知世所行 遍知方便力
能充滿一切 眾生之所願
常住於平等 護持佛正法
一切無所念 則是³³²如來法
若有佛無佛 是法常住世
能通達是³³³相 是名護持法
諸法之實相 了達知其義
安住於此中 而為人演說
行於甚深法 魔所不能測
是人於諸法 無所貪著故
願求諸佛慧 亦不著願求
是慧於十方 求之不可得
諸佛慧無礙 不著法非法

³³² 麗本：是則；永樂北藏本及龍藏本：則是

³³³ 麗本：此；永樂北藏本及龍藏本：是

若能不著此 究竟得佛道
其諸樂善人 布施轉高尊
捨一切所有 而心不傾動
諸法不可捨 亦復不可取
一切世間法 根本不可得
能知一切法 非施非捨相
是名大施主 於法無所見
是等諸菩薩 不計我我所
是故行施時 不生貪惜心
諸所有布施 皆迴向佛道
布施及菩提 不住是二相
無作無起戒 常住於此中
亦不作念言³³⁴ 我住是持戒
智者知戒相 不生亦不作
是故戒清淨 猶若如虛空
觀身如鏡像 言說如響聲
心則如幻化 不以戒自高
其心常柔軟 安住³³⁵寂滅性
悉滅³³⁶一切惡 通達於善法
持戒及毀戒 不得此二相

³³⁴ 麗本：是念；永樂北藏本及龍藏本：念言

³³⁵ 麗本：處；永樂北藏本及龍藏本：住

³³⁶ 麗本：除；永樂北藏本及龍藏本：滅

如是見法性 則持無漏戒
已度忍辱岸 能忍一切惡
於諸眾生類 其心常平等
諸法念念滅 其性常不住
於中無罵辱 亦無有恭敬
若節節解身 其心終不動
知心不在內 亦復不在外
身怨及刀杖 皆從四大起
於地水火風 未曾有傷損
通達於此事 常行忍辱法
菩薩行如是 眾生不能動
勇猛勤精進 堅住於大乘
是人於身心 而無所依止
雖知生死本 其際不可得
為諸眾生故 莊嚴大誓願
法無決定性³³⁷ 何許有滅相
本際不可得 為顛倒故說
法性不可議 常住於世間
若能知如是 不生亦不滅
菩薩念眾生 不解是法相
為之勤精進 令得離顛倒

³³⁷ 麗本：生；永樂北藏本及龍藏本：性

諸佛常不得 眾生決定相
而彼弘本願 當觀精進力
思惟一切法 知皆如幻化
不得堅牢相 觀之如虛空
從虛妄分別 貪著生苦惱
為斯開法門 令得入涅槃
為彼行精進 而不壞於法
離法非法故 常行真精進
是等行遠離 了達無諍定
獨處無憤鬧 常畏於生死
樂住於閑居 猶如犀一角
遊戲諸禪定 明達諸神通
心常住平等 處空閑聚落
威儀無變異 恒樂於禪定
信解常定法 及寂滅無漏
其心得解脫 故說常定者
自住平等法 以此導眾生
不違平等行 故說常定者
志念常堅固 不忘菩提心
亦能化眾生 故說常定者
常念於諸佛 真實法性身
遠離色身相 故說常定者

常修念於法 如諸法實相
亦無有憶念 故說常定者
常修念於僧 僧即是無為
離數及非數 常入如是定³³⁸
悉見十方國³³⁹ 一切群³⁴⁰生類
而於眼色中 終不生二相
諸佛所說法 一切能聽受
而於耳聲中 亦不生二相
能於一心中 知諸眾生心
自心及彼心 此二不分別
憶念過去世 如恒河沙劫
是先及是後 亦復不分別
能至無量土 現諸神通力
而於身心中 無有疲倦想
分別知諸法 樂說辯無盡
於無央數劫 開示法性相
智慧度彼岸 善解陰入界³⁴¹
常為眾生說 無取無戲論
善知因緣法 遠離二邊相
知是煩惱因 亦知是淨因

³³⁸ 麗本：者；永樂北藏本及龍藏本：定

³³⁹ 麗本：佛；永樂北藏本及龍藏本：國

³⁴⁰ 麗本：眾；永樂北藏本及龍藏本：群

³⁴¹ 麗本：界入；永樂北藏本及龍藏本：入界

信解因緣法 則無諸邪見
法皆屬因緣 無有定根本
我見與佛見 空見生死見
涅槃之見等 皆無是諸見
無量智慧光 知諸法實相
無闇無障礙 是行菩提道
是乘名大乘 不可思議乘
悉容諸³⁴²眾生 猶不盡其量
一切諸乘中 是乘為第一
如此³⁴³大乘者 能出生餘乘
餘乘有限量 不能受一切
唯此無上乘 能悉受眾生
若行此無量 虛空之大乘
於一切眾生 無有慳悋心
虛空無有量 亦無有形色
大乘亦如是 無量無障礙
若一切眾生 乘於此大乘
當觀是乘相 寬博多所容
無量無數劫 說大乘功德
及乘此乘者 不可得窮盡

³⁴² 麗本：受；永樂北藏本及龍藏本：諸

³⁴³ 麗本：是；永樂北藏本及龍藏本：此

若人聞此³⁴⁴經 乃至持一偈
永脫於諸難 得到安隱處
敬念此經者 捨是身已後
終不墮惡道 常生人天³⁴⁵中
於後惡世時 若得聞是經
我皆與受³⁴⁶記 究竟成佛道
若持³⁴⁷此經者 佛法在是人
是人在佛法 亦能轉法輪
若人持是經 能轉無量劫
生死諸往來 得近於佛道
若能持是經 精進大智慧
是名極勇猛 能破魔軍眾
我於燃燈佛 住忍得受記
若有樂是經 我受³⁴⁸記亦然
若人於佛後 能解說是經
佛雖不在世 為能作佛事

佛說是偈時，五千天子皆發阿耨多羅三藐三菩提心；二千菩薩得無生法忍；十千比丘不受諸法，漏盡，心得解脫；三萬二千人遠塵離垢，於

³⁴⁴ 麗本：是；永樂北藏本及龍藏本：此

³⁴⁵ 麗本：天人；永樂北藏本及龍藏本：人天

³⁴⁶ 麗本：授；永樂北藏本及龍藏本：受

³⁴⁷ 麗本：住；永樂北藏本及龍藏本：持

³⁴⁸ 麗本：授；永樂北藏本及龍藏本：受

諸法中得法眼淨。

發菩提心品第十八³⁴⁹

爾時，文殊師利法王子白佛言：「世尊！如我解佛所說義，若有人發菩提願是為邪願。所以者何？諸有所得悉皆是邪。若計得菩提而發願者，是人諸所作行皆為是邪。所以者何？菩提不在欲界，不在色界，不在無色界，菩提無有住處，不應發願。世尊！譬如有人願得虛空，寧得虛空³⁵⁰不？」

佛言：「不也！」

「世尊！菩薩亦復如是，發同虛空相菩提之願，即是發虛空願，菩提出過三世非是受相，不可願也。若菩薩起二相發菩提心，作是念：『生死與菩提異，邪見與菩提異，涅槃與菩提異。』是則不行菩提道也。」

爾時，思益梵天謂文殊師利：「菩薩云何行名菩提行？」

答言：「若菩薩行一切法，而於法無所行，是名行菩提行。所以者何？出過一切所行是行菩

³⁴⁹ 麗本：行道品第十一（丹發菩提心品第十八）；永樂北藏本及龍藏本：發菩提心品第十八

³⁵⁰ 麗本：虛空；永樂北藏本：虛空；龍藏本：空；校勘：虛空

提。」

又問：「云何出過一切所行是行菩提？」

答言：「離眼、耳、鼻、舌、身、意諸緣相，是名出過一切所行。」

又問：「出過有何義？」

答言：「不出過平等。所以者何？一切法平等即是菩提。」

又問：「云何是發菩提願？」

答言：「當如菩提。」

又問：「云何為菩提？」

答言：「菩提非過去、非未來、非現在，是故菩薩應以三世清淨心發菩提願。梵天，如過去、未來、現在法，從本已³⁵¹來常不生，不生故不可說，如是發願，無所發願，是發一切願。所以者何？以是行道能得薩婆若。」

又問：「何故說言薩婆若？」

答言：「悉知一切真智慧故，名為³⁵²薩婆若。」

又問：「何等是真智慧？」

答言：「無變異相。如眾生無變異相，真智慧亦無變異相。」

³⁵¹ 麗本：以；永樂北藏本及龍藏本：已

³⁵² 麗本：名；永樂北藏本及龍藏本：名為

又問：「云何是眾生相？」

答言：「假名字畢竟離是眾生相，如是相則無變異。若眾生與菩提異是為變異，如菩提相，眾生亦爾，是故無變異。菩提不可以餘道得，但我平等故菩提平等，眾生性無³⁵³我故，如是可得菩提。是故，菩提無有變異。所以者何？如虛空無變異相，一切諸法亦無變異相。」

爾時，思益梵天謂文殊師利：「如來是實語者，能說如是法。」

文殊師利言：「如來於法無所說。何以故？如來尚不得諸法，何況說法？」

思益言：「如來豈不分別³⁵⁴諸法，是世間、是出世間，是有為、是無為耶？」

文殊師利言：「於汝意云何？是虛空可說、可分別不？」

思益言：「不也！」

文殊師利言：「今說虛空名字，以所說故有生有滅耶？」

思益言：「不也！」

文殊師利言：「如來說法亦復如是，不以說

³⁵³ 麗本：平等無；永樂北藏本及龍藏本：無

³⁵⁴ 麗本：說；永樂北藏本及龍藏本：分別

故諸法有生有滅，如此說法是不可說相；亦以此法有所教誨，是無所教誨。所以者何？如說法性，不說法性亦如是。是故，說一切法住於如中，如³⁵⁵亦無所住。」

³⁵⁶爾時，釋、梵、四天王俱在會中，即以天華散於佛上而作是言：「世尊！若善男子、善女人聞文殊師利說法³⁵⁷，有信解者，當知是人能破魔軍及餘怨敵³⁵⁸。所以者何？文殊師利今所說法，能破一切邪見妄想。世尊！若善男子、善女人聞於³⁵⁹是法不驚不怖，當知是人不從小功德來。若是經所在之處，當知此處則為諸佛擁護受用。若聞是經處，當知此處轉於法輪。是經在所住處聚落、村邑、山林、曠野、塔寺、僧房³⁶⁰、經行之處，諸魔、外道、貪著之人不能侵擾。世尊！若人多供養過去諸佛，乃能得聞如是經典。世尊！我等於此經中得智慧光明，而不能得報佛及文殊師利、思益梵天之恩。世尊！我等所從聞經，於是法師生世尊想；我等常當隨侍說是經者，此善

³⁵⁵ 麗本：是如；永樂北藏本及龍藏本：如

³⁵⁶ 麗本此處分品分卷，卷四稱歎品第十二（丹無此品名）；永樂北藏本及龍藏本不分卷、不分品

³⁵⁷ 麗本：是法；永樂北藏本及龍藏本：法

³⁵⁸ 麗本：魔怨；永樂北藏本及龍藏本：魔軍及餘怨敵

³⁵⁹ 麗本：聞；永樂北藏本及龍藏本：聞於

³⁶⁰ 麗本：坊；永樂北藏本及龍藏本：房

男子常為諸天之所擁護。若人書寫是經，讀誦解說時，無量諸天為聽法故來至其所。」

³⁶¹爾時，世尊語³⁶²釋、梵、四天王等大眾言：

「善哉！善哉！如汝所說，若三千大千世界滿中珍寶以為一分，聞是經者所得功德以為一分，其福勝彼³⁶³。置是三千大千世界，若恒河沙等十方世界滿中珍寶，聞是經者所得功德復勝於彼。諸善男子，若欲得功德者，當聽是經；欲得身色端正，欲得財富，欲得眷屬，欲得自在，欲得具足天樂人樂，欲得名稱，欲得多聞、憶念堅固、正行威儀、戒定智慧、解達經書，欲得善知識，欲得三明六通，欲得一切善法，欲得阿耨多羅三藐三菩提，欲得與一切眾生樂具，欲得涅槃者，當聽是經，受持讀誦，如法修行，廣為人說。諸善男子，若行是經者，我不見其人不得如是³⁶⁴具足快樂。

「善³⁶⁵男子，我今語汝，若人所從聞是經處，若和尚³⁶⁶、若阿闍梨，我不見世間供養之具能報其恩。是法出於世間，世間供養所不能報；是法

³⁶¹ 麗本此处分品，詠德品第十三（丹無此品名）；永樂北藏本及龍藏本不分品

³⁶² 麗本：讚；永樂北藏本及龍藏本：語

³⁶³ 麗本：福勝於彼；永樂北藏本及龍藏本：其福勝彼

³⁶⁴ 麗本：此；永樂北藏本及龍藏本：是

³⁶⁵ 麗本：諸善；永樂北藏本及龍藏本：善

³⁶⁶ 麗本：上；永樂北藏本及龍藏本：尚

度於世間，世間財物所不能報；是法無染，染污之物所不能報。諸善男子，是法餘無能報，唯³⁶⁷有一事：如說修行。若人於此法中能如說修行³⁶⁸者，是名能報師恩，亦為恭敬於師，淨畢報恩；是名不空食人信施；是則名為³⁶⁹順如來語、順如來教；是名越度眾³⁷⁰流；是名過諸險道；是名建立勝幢；是名能破敵陣；是名師子之王，無所畏故；是名象王，心柔軟故；是名牛王，外道論師無能壞故；是名醫王，能療一切病³⁷¹故；是名無所驚怖，能說甚深法故；是名能具足捨，捨諸煩惱故；是名持清淨戒，究盡善法故；是名得大忍辱，離我、我所故；是名大精進力，於無量劫心無倦故；是名具足禪定，常念繫心住一處故；是名有大智慧，善解言說諸章句故；是名有大功³⁷²德，以無量福莊嚴身相故；是名有大威德，能蔽日月諸光明故；是名大力，持佛十力故；是名大雲，能震法雷故；是名大雨，滅³⁷³煩惱塵故；是名為舍，至涅槃故；是名大救，救生死畏故；是

³⁶⁷ 麗本：惟；永樂北藏本及龍藏本：唯

³⁶⁸ 麗本：行；永樂北藏本及龍藏本：修行

³⁶⁹ 麗本：是名；永樂北藏本及龍藏本：是則名為

³⁷⁰ 麗本：渡諸；永樂北藏本及龍藏本：度眾

³⁷¹ 麗本：眾生病；永樂北藏本及龍藏本：病

³⁷² 麗本：威；永樂北藏本及龍藏本：功

³⁷³ 麗本：能滅；永樂北藏本及龍藏本：滅

名燈明，離無明闇故；是名歸趣，魔所怖者之所依故；是名眾生究竟之道；是名得位，坐道場故；是名已得法眼；是名見諸法如；是名知空法相故³⁷⁴；是名安住大悲；是名安立大慈；是名不捨一切眾生；是名背於小乘；是名向於大乘；是名除捨顛倒；是名至於平等；是名入於法位；是名安住道場；是名破壞諸魔；是名轉於法輪。諸善男子，我若一劫、若減一劫，稱揚讚歎說是如說修行功德，不能³⁷⁵窮盡，如來之辯亦不可盡。」

³⁷⁶爾時，會中有天子，名不退轉，白佛言：「世尊！所說隨法行，隨法行者為何謂耶？」

佛告天子：「隨法行者，不行一切法，是名隨法行。所³⁷⁷以者何？若不行諸法，則不分別是正是邪。如是行者不³⁷⁸行善、不行不善，不行有漏、不行無漏，不行世間、不行出世間，不行有為、不行無為，不行生死、不行涅槃，是名隨法行；若起法相者，是則不名隨法行也。若念言：『我行是法。』是則戲論、不隨法行；若不受一切法，則隨法行；於一切法無憶念、無分別、無

³⁷⁴ 麗本：相；永樂北藏本及龍藏本：相故

³⁷⁵ 麗本：可；永樂北藏本及龍藏本：能

³⁷⁶ 麗本此處分品，等行品第十四（丹無此品名）；永樂北藏本及龍藏本不分品

³⁷⁷ 麗本：所；永樂北藏本及龍藏本：是名隨法行。所

³⁷⁸ 麗本：則不；永樂北藏本及龍藏本：不

所行，是名隨法行。」

爾時，不退轉天子白佛言：「世尊！若能如是隨法行者，是人畢竟不復邪行。所以者何？正行者名為畢竟。住邪道者無隨法行，住正道者有隨法行。世尊！行正行者，無有邪法。所以者何？諸法平等無差別故。」

爾時，思益梵天謂不退轉天子：「汝於此中隨法行不？」

答言：「若世尊所說法中有二相者，我當行隨法行；今以無二相是隨法行，於中行者及所行法俱不可得。梵天，我以不二法行隨法行，離諸分別故如，諸法如行，是名隨法行。」

思益言：「汝未曾見此佛國³⁷⁹土耶？」

天子言：「此佛土亦未曾見我。」

思益言：「此佛土不能思惟分別見與不見。」

天子言：「我亦不思惟分別曾於佛土見與不見。」

思益言：「何人未見能見？」

天子³⁸⁰言：「一切凡夫未見聖法位。若能入者，是為先所未見而見；是法位相非眼所見，非

³⁷⁹ 麗本：佛；永樂北藏本及龍藏本：佛國

³⁸⁰ 麗本：答；永樂北藏本及龍藏本：天子

耳、鼻、舌、身、意、識所知；但應隨如相，見如、眼如、乃至意如，法位如亦如是。若能如是見者，是名正見。」

思益梵天所問經卷第三

思益梵天所問經卷第四

姚秦三藏法師鳩摩羅什譯³⁸¹

師子吼品第十九³⁸²

³⁸³爾時，釋提桓因白佛言：「世尊！譬如賈客主入於寶洲，其所見皆是寶物。如是成就不可思議功德者，有所樂說皆是法寶，所樂說者皆示³⁸⁴實際。所樂說者，於諸法中無所貪著，不著彼我。所樂說者，皆是真實無有顛倒。所樂說者，過去際空，未來際不可得，現在際不起見。所樂說者，不信解者得信解，信解者得解脫。所樂說者，破增上慢；無增上慢者，自說所作已辦。所樂說者，魔不得便；所聽法者，超度魔事。所樂說者，未生善法令生，已生善法令得增長。所樂說者，已生諸煩惱令斷，未生諸煩惱令不生。所樂說者，未大莊嚴³⁸⁵令大莊嚴，已大莊嚴者令不退轉。所樂說者，不斷滅諸法而護佛法。世尊！以是樂說，能降伏一切外道。所以者何？一切野

³⁸¹ 麗本：姚秦龜茲國三藏鳩摩羅什譯

³⁸² 麗本：授不退轉天子記品第十五（丹師子吼品第十九）；永樂北藏本及龍藏本：師子吼品第十九

³⁸³ 麗本此處不分卷；永樂北藏本及龍藏本此處為第四卷卷首

³⁸⁴ 麗本：是；永樂北藏本及龍藏本：示

³⁸⁵ 麗本：莊嚴者；永樂北藏本及龍藏本：莊嚴

干不能於師子王前自現其身，何況³⁸⁶聞其吼？世尊！一切外道諸論議師不能堪忍無上師子之吼，亦復如是。」³⁸⁷

爾時，不退轉天子謂釋提桓因：「憍尸迦，所言師子吼師子吼者為何謂也³⁸⁸？」

答言：「若行者說法無所貪著，是名師子吼。若行者貪著所見而有所說，是野干鳴，不名師子吼，起諸邪見故。天子，汝當復說所以為師子吼者？」

天子言：「憍尸迦，有所說法，乃至如來尚不貪著，何況餘法？是名師子吼。又，憍尸迦，如說修行名師子吼，決定說法名師子吼，說法無畏名師子吼。又，憍尸迦，若行者為不生、不滅、不出故說法，名師子吼。若為無垢、無淨、無合、無散故說法，名師子吼。又，憍尸迦，師子吼名決定說一切法無我、無眾生；師子吼名決定說諸法空；師子吼名守護法故而有所說；師子吼名作是願言：『我當作佛，滅一切眾生苦惱。』；師子吼名於清淨所須物中少欲知足；師子吼名常能不捨阿蘭若住處；師子吼名行施唱導；師子吼名不

³⁸⁶ 麗本：況；永樂北藏本及龍藏本：何況

³⁸⁷ 麗本此處作注，注曰：（八幅爾時佛告下，丹為梵行牢強精進品第二十）；永樂北藏本及龍藏本無

³⁸⁸ 麗本：耶；永樂北藏本及龍藏本：也

捨持戒；師子吼名等心怨親；師子吼名常行精進不捨本願；師子吼名能除煩惱；師子吼名以慧³⁸⁹善知所行。」

說是師子吼法時，三千大千世界六種震動，百千伎樂不鼓自鳴，其大光明普照天地。百千諸天踊躍歡喜言：「我等聞不退轉天子說師子吼法，於閻浮提再見轉法輪。」

時佛微笑。諸佛常法，若微笑時，若干百千種青、黃、赤、白、紅、紫等光從口中出，普照無量無邊世界，上過梵世蔽日月光，還繞身三匝，從頂相入。

於是，思益梵天向佛合掌，以偈讚曰：

度一切慧最勝尊	悉知三世眾生行
智慧功德及解脫	唯願演說笑因緣
佛慧無量無障礙	聲聞緣覺所不及
知眾生心隨應 ³⁹⁰ 說	願最上尊說笑緣
佛光可樂淨無穢	普照天人蔽日月
須彌鐵圍及眾山	願無比尊說笑緣
大聖寂然離瞋恨	天人瞻仰無厭足
一切皆蒙得快樂	願為分別說笑 ³⁹¹ 緣

³⁸⁹ 麗本：智慧；永樂北藏本及龍藏本：慧

³⁹⁰ 麗本：意；永樂北藏本及龍藏本：應

³⁹¹ 麗本：笑因；永樂北藏本及龍藏本：說笑

通達諸法空無我 水沫雲露夢所見
水中月影虛空相 願以妙音說笑緣
離分別想諸邪見 了空無相及無作
常樂禪定寂然法 願說放此淨光緣
不著文字言音聲 說不依法及眾生
彼各自謂為我說 願神通智說笑緣
佛為醫王滅眾病 那羅延力救世者
趣捨光³⁹²明究竟道 天人供養說笑緣

梵行牢強精進品第二十³⁹³

爾時，佛告思益梵天：「汝見是不退轉天子不？」

「唯然，已見！」

「梵天，此不退轉天子從今已後，過三百二十萬阿僧祇劫當得作佛，號須彌燈王如來、應供、正遍知、明行足、善逝、世間解、無上士、調御丈夫、天人師、佛、世尊，世界名妙華³⁹⁴，劫名梵歎。其佛國土以閻浮檀金琉璃為地，純以菩薩為僧，無諸魔怨。所須之物應念即至，佛壽無量不可計歲³⁹⁵。」

³⁹² 麗本：舍燈；永樂北藏本及龍藏本：捨光

³⁹³ 麗本不分品；永樂北藏本及龍藏本：梵行牢強精進品第二十

³⁹⁴ 麗本：化；永樂北藏本及龍藏本：華

³⁹⁵ 麗本：數；永樂北藏本及龍藏本：歲

於是，思益梵天謂不退轉天子：「如來今已授仁者記。」

天子言：「梵天，如與如、法性授³⁹⁶記，與我授³⁹⁷記亦復如是。」

思益言：「如、法性不可授記。」

天子言：「如、法性不可授記者，當知一³⁹⁸切菩薩授³⁹⁹記亦復如是。」

思益言：「若如來不與汝記，汝於過去諸佛所則為空住梵行。」

天子言：「若無所住是住梵行。」

思益言：「云何無住而住梵行？」

答言：「若不住欲界、不住色界、不住無色界，是住梵行。又，梵天，若住⁴⁰⁰者，不住我、不住眾生、不住壽命⁴⁰¹、不住人⁴⁰²，是住梵行。以要言之，若不住法、不住非法，是住梵行。」

又問：「梵行⁴⁰³有何義？」

答言：「住不二道，是梵行義！」

又問：「住不二道，為住何所？」

³⁹⁶ 麗本：受；永樂北藏本及龍藏本：授

³⁹⁷ 麗本：受；永樂北藏本及龍藏本：授

³⁹⁸ 麗本：當知一；永樂北藏本：記者當；龍藏本：當知一

³⁹⁹ 麗本：受；永樂北藏本及龍藏本：授

⁴⁰⁰ 麗本：行；永樂北藏本及龍藏本：住

⁴⁰¹ 麗本：命者；永樂北藏本及龍藏本：命

⁴⁰² 麗本：人者；永樂北藏本及龍藏本：人

⁴⁰³ 麗本：行者；永樂北藏本及龍藏本：行

答言：「住不二道，是即不住一切諸法。所以者何？眾賢聖無所住、不取於法，能度諸流。」

又問：「云何為修道？」

答言：「不墮有，不墮無，亦不分別是、是無。習如是者，名為修道。」

又問：「以何法修道？」

答言：「不以見、聞、覺、知法，不以得，不以證，於一切法無相無示，名為修道。」

又問：「何謂菩薩牢強精進？」

答言：「若菩薩於諸法不見一相，不見異相，是名菩薩牢強精進大莊嚴也。於諸法不壞法性故，於諸法無著、無斷、無增、無減，不見垢、不見淨⁴⁰⁴，出過⁴⁰⁵法性，是名菩薩第一牢強精進⁴⁰⁶，所謂身無所起、心無所起。」

於是，世尊讚不退轉天子：「善哉！善哉！」讚已，語思益梵天言：「如⁴⁰⁷天子所說：『身無所起、心無所起，是為第一牢強精進。』梵天，我念宿世一切所行牢強精進、持戒頭陀，於諸師長供養恭敬，在空閑處專精行道，讀誦多聞，愍念眾生，給其所須；一切難行苦行愍勩精進，而過

⁴⁰⁴ 麗本：淨；永樂北藏本及龍藏本：不見淨

⁴⁰⁵ 麗本：於；永樂北藏本及龍藏本：過

⁴⁰⁶ 麗本：精進；永樂北藏本及龍藏本：牢強精進

⁴⁰⁷ 麗本：如此；永樂北藏本及龍藏本：如

去諸佛不見授阿耨多羅三藐三菩提記。所以者何？我住身、口、心，起精進相故。梵天，我後得如天子所說牢強精進故，然燈佛授我記言：『汝於來世當得作佛，號釋迦牟尼。』是故，梵天，若菩薩疾欲受記，應當修習如是牢強精進，謂於諸法不起精進相。」

「世尊！何等是不起相精進？」

佛言：「三世等空精進，是名不起相精進。」

「世尊！云何為三世等空精進？」

佛言：「過去心已滅，未來心未至，現在心無住；若法滅不復更起，若未至即無生相，若無住即住實相。又實相亦無有生，若法無生則無去、來、今，若無去、來、今者則從本已來性常不生，是名三世等空精進，能令菩薩疾得授⁴⁰⁸記。」

「梵天，菩薩成就如是法忍者，能了達一切法無所捨，是名檀波羅蜜；了達一切法無漏，是名尸羅⁴⁰⁹波羅蜜；了達一切法無傷，是名羸提波羅蜜；了達一切法無所起，是名毗梨耶波羅蜜；了達一切法平等，是名禪波羅蜜；了達一切法無⁴¹⁰分別，是名般若波羅蜜。若菩薩如是了達，則

⁴⁰⁸ 麗本：受；永樂北藏本及龍藏本：授

⁴⁰⁹ 麗本：尸；永樂北藏本及龍藏本：尸羅

⁴¹⁰ 麗本：無所；永樂北藏本及龍藏本：無

於諸法無增無減、無正無邪。是菩薩雖布施，不求果報；雖持戒，無所貪著；雖忍辱，知內外空；雖精進，知無起相；雖禪定，無所依止；雖行慧，無所取相。

「梵天，菩薩成就如是法忍，雖示現一切所行而無所染污。是人得世間平等相，不為利衰、毀譽、稱譏、苦樂之所傾動，出過一切世間法故；不自高、不自下、不喜不感、不動不逸、無二心、離諸緣，得無二法，為墮二見⁴¹¹法眾生起大悲心，為其受身而教化之。梵天，是名第一牢強精進，所謂得無我、空、法忍，而於眾生起大悲心，為之受身。」

說是牢強精進相時，八千菩薩得無生法忍，佛為受記，皆當得阿耨多羅三藐三菩提，各於異土得成佛道，皆同一號，號堅精進。

海喻品第二十一⁴¹²

爾時，大迦葉白佛言：「世尊！譬如大⁴¹³龍，若欲雨時，雨於大海；此諸菩薩亦復如是，以大法雨雨菩薩心。」

⁴¹¹ 麗本：見二；永樂北藏本及龍藏本：二見

⁴¹² 麗本不分品；永樂北藏本及龍藏本：海喻品第二十一

⁴¹³ 麗本：諸大；永樂北藏本及龍藏本：大

佛言：「迦葉，如汝所說，諸大龍王所以不雨閻浮提者，非有愆也，但以其地不堪受故。所以者何？大龍所雨，澍如車軸。若其雨者，是閻浮提及城邑、聚落、山林、陂池，悉皆漂流如漂棗葉，是故大龍不雨大雨於閻浮提。如是，迦葉，此諸菩薩所以不雨法雨於餘眾生者，亦無愆心，以其器不堪受如是等法。是故此諸菩薩但於甚深智慧無量大海菩薩心中，雨如是等不可思議無上法雨。

「迦葉，又如大海，堪受大雨，澍如車軸，不增不減；此諸菩薩亦復如是，若於一劫、若復百劫，若聽若說，其法湛然，不增不減。

「迦葉，又如大海，百川眾流入其中者，同一鹹味；此諸菩薩亦復如是，聞種種法、種種議論者⁴¹⁴，皆能信解為一空味。⁴¹⁵

「迦葉，又如大海，澄淨無垢，濁水流入即皆清潔；此諸菩薩亦復如是，淨諸結恨⁴¹⁶塵勞之垢。

「迦葉，又如大海，甚深無底；此諸菩薩亦

⁴¹⁴ 麗本：論議；永樂北藏本及龍藏本：議論者

⁴¹⁵ 麗本此處作注，注曰：（前幅爾時大迦葉下丹本為海喻品第二十一）；永樂北藏本及龍藏本無

⁴¹⁶ 麗本：恨；永樂北藏本：恨；龍藏本：根；校勘：恨

復如是，能思惟無⁴¹⁷量法，故名為甚深，一切聲聞、辟支佛不能測，故名為無底。

「迦葉，又如大海，集無量水；此諸菩薩亦復如是，集無量法、無量智慧，是故說諸菩薩心如大海。

「迦葉，又如大海，積聚種種無量珍寶；此諸菩薩亦復如是，入種種法門，集諸法寶，種種行道，出生無量法寶之聚。

「迦葉，又如大海，有三種寶：一者少價、二者有價、三者無價；此諸菩薩所可說法亦復如是，隨諸眾生根之利鈍令得解脫，有以小乘而得解脫，有以中乘而得解脫，有以大乘而得解脫。

「迦葉，又如大海，漸漸轉深；此諸菩薩亦復如是，向薩婆若漸漸轉深。

「迦葉，又如大海，不宿死屍；此諸菩薩亦復如是，不宿聲聞、辟支佛心，亦不宿慳貪、毀戒、瞋恚、懈怠、亂念、愚癡之心，亦不宿我、人、眾生之見。

「迦葉，又如劫盡燒時，諸小陂池、江河、泉源在前枯竭，然後大海乃當消盡；正法滅時亦復如是，諸行小道正法先盡，然後菩薩大海之心

⁴¹⁷ 麗本：入無；永樂北藏本及龍藏本：無

正法乃滅。迦葉，此諸菩薩寧失身命不捨正法。汝謂菩薩失正法耶？勿造斯觀。迦葉，如彼大海有金剛珠，名集諸寶，乃至七日出時，火至梵世，而此寶珠不燒不失，轉至他方大海之中。若是寶珠在此世界，世界燒者無有是處；此諸菩薩亦復如是，正法滅時，七邪法出，爾乃至於他方世界。何等七？一者，外道論；二者，惡知識；三者，邪用道法；四者，互相惱亂；五者，入邪見棘林；六者，不修福德；七者，無有得道。此七惡出時，是諸菩薩知諸眾生不可得度，爾乃至於他方佛國，不離見佛、聞法、教化眾生、增長善根。

「迦葉，又如大海，為無量眾生之所依止；此諸菩薩亦復如是，眾生依止得三種樂：人樂、天樂、涅槃之樂。

「迦葉，又如大海，鹹不可飲；此諸菩薩亦復如是，諸魔外道不能吞滅。」

於是，大迦葉白佛言：「世尊！大海雖深尚可測量，此諸菩薩不可測也。」

佛告迦葉：「三千大千世界微塵猶可知數⁴¹⁸，此諸菩薩功德無量不可數也。」

爾時，世尊欲重宣此事，而說偈言：

⁴¹⁸ 麗本：數知；永樂北藏本及龍藏本：知數

譬如大海能悉受一切眾水無滿時
此諸菩薩亦如是常求法利無厭足
又如大海納眾流一切悉歸無損益
此諸菩薩亦如是聽受深法無增減
又如大海不受濁濁水流入悉清淨
此諸菩薩亦如是不受一切煩惱垢
又如大海無涯底此諸菩薩亦如是
功德智慧無有量一切眾生不能測
又如大海無別異百川流入皆一味
此諸菩薩亦如是所聽受法同一相
又如大海所以成非但為一眾生故
此諸菩薩亦如是普為一切發道心
如海寶名集諸寶⁴¹⁹因是寶故有眾寶
菩薩寶聚亦如是從菩薩寶出三寶⁴²⁰
如大海出三種寶而此大海無分別
菩薩說法亦如是三乘度人無彼此
又如大海漸漸深此諸菩薩亦如是
為眾生故修功德迴向甚深薩婆若
又如大海不宿屍此諸菩薩亦如是
發清淨心菩提願不宿聲聞煩惱心

⁴¹⁹ 麗本：珠名集寶；永樂北藏本及龍藏本：名集諸寶

⁴²⁰ 麗本：諸寶；永樂北藏本及龍藏本：三寶

如大海有堅牢寶 其寶名曰集諸寶
劫燒盡⁴²¹時終不燒 轉至他方諸佛國
正法滅時亦如是 堅精進者能持法
知諸眾生不可度 轉至他方諸佛國⁴²²
三千世界欲壞時 火劫將起燒天地
百川眾流在前涸 爾乃⁴²³水王於後竭
行小道者亦如是 法欲盡時在前滅
菩薩勇猛不惜身 護持正法後乃盡
若佛在世滅度後 是心中法寶不滅
深心清淨住是法 以此善法修行道
百千眾生依止海 海成非為一眾生
菩薩發心亦如是 為度一切眾生故
十方世界諸大海 猶尚可得測其量
是諸菩薩所行道 聲聞緣覺不能測
迦葉當知諸菩薩 勇猛精進迴向心
願欲作佛度眾生 尚無與等何況勝
是德寶聚如大海 是可供養良福田
是為最上大醫王 能療一切眾生病
是世歸依作救護 洲渚燈明究竟道
能與世間無明眼 得眼則能服甘露

⁴²¹ 麗本：盡燒；永樂北藏本及龍藏本：燒盡

⁴²² 麗本：所；永樂北藏本及龍藏本：國

⁴²³ 麗本：時；永樂北藏本及龍藏本：乃

是為世間諸法王 是為帝釋決斷智
是為梵王行四禪 是為能轉梵法輪
是為大智導世師 示諸邪徑正真道
是為勇猛能破魔 是為清淨除惱穢
是修白法如滿月 光明高顯猶如日
智慧超出如須彌 猶如密雲雨甘露
是無所畏如師子 是心調柔如象王
是則譬如金剛山 一切外道不能壞
是則清淨猶如水 是有威猛如大火
是則如風無障礙 是則如地無能動
是拔憍慢我根等 是如藥樹無分別
是持淨戒如蓮華 是於世法無所染
是如優曇鉢羅華 千萬億劫時一出
是為知報佛之恩 是為不斷諸佛種
是為精進行大悲 是用慈喜而超出
是能捨離五欲心 是常求佛法寶財
是行布施為最勝 是持淨戒無等侶
是忍辱健無⁴²⁴儔 匹 是勤精進無厭倦
是行禪定具神通 能至無量諸佛土
常見諸佛聽受法 如其所聞為人說
是知眾生所行道 隨其性欲根利鈍

⁴²⁴ 麗本：疇；永樂北藏本及龍藏本：儔

是名善知方便力 是然慧燈得濟處
是能善知一切法 皆從和合因緣生
是能決了因緣相 離於我見樂平等
是能正觀於諸法 為從何來至何所
善知諸法無去來 常住法性而不動
是見有為法皆空 增益大悲濟眾生
眾生妄想起眾苦 為欲度故修行道
凡夫分別我我所 行於種種諸邪徑⁴²⁵
是能曉了法實相 為斷諸見講說法
無常為常不淨⁴²⁶淨 無我謂我苦為樂
凡夫顛倒貪著故 生死前際不可知
是能知此從顛倒 無我無人無眾生
我當如是修正道 無常樂我⁴²⁷及不淨
迦葉當知此菩薩 我所稱讚諸功德
於其所行不可盡 猶如大地舉一塵
若發菩提心不退 三千大千供養具
若復有供過於是 悉應供養如是人
若人發心願作佛 是則恭敬供養我
於去來今十方⁴²⁸佛 亦皆恭敬供養已

⁴²⁵ 麗本：見；永樂北藏本及龍藏本：徑

⁴²⁶ 麗本：清；永樂北藏本及龍藏本：淨

⁴²⁷ 麗本：我樂；永樂北藏本及龍藏本：樂我

⁴²⁸ 麗本：諸去來現在；永樂北藏本及龍藏本：去來今十方

建立法品第二十二⁴²⁹

爾時，思益梵天謂文殊師利法王子：「當請如來護念斯經，於後末世五百歲時令廣流布。」

文殊師利言：「於意云何？佛於是經有說⁴³⁰、有示、可護念耶⁴³¹？」

思益言：「不也。」

「梵天，是故當知，一切法無說、無示、無有護念，是法終不可滅、不可護念。若欲護此法者，為欲護念虛空。梵天，菩薩若⁴³²欲有所受法⁴³³，即非法言。所以者何？出過一切言論，是名菩薩樂無諍訟。梵天，若有菩薩於此眾中作是念：『今說是法。』當知是人即非聽法。所以者何？不聽法者乃為聽法。」

梵天言：「何故說不聽法者乃為聽法？」

文殊師利言：「不漏眼⁴³⁴、耳、鼻、舌、身、意⁴³⁵，是聽法也。所以者何？若於內六入不漏，色、聲、香、味、觸、法中乃為聽法。」

⁴²⁹ 麗本：建立法品第十六（丹天子授記品第二十二）；永樂北藏本及龍藏本：建立法品第二十二

⁴³⁰ 麗本：有法、有說；永樂北藏本及龍藏本：有說

⁴³¹ 麗本：不；永樂北藏本及龍藏本：耶

⁴³² 麗本：若言；永樂北藏本及龍藏本：若

⁴³³ 麗本：法者；永樂北藏本及龍藏本：法

⁴³⁴ 麗本：眼；永樂北藏本及龍藏本：不漏眼

⁴³⁵ 麗本：不漏；永樂北藏本及龍藏本：意

爾時會中三萬二千天子、五百比丘、三百比丘尼、八百優婆塞⁴³⁶，聞文殊師利所說，皆得無生法忍；得是忍已作是言：「如是！如是！文殊師利，如仁者所說，不聽法者乃為聽法。」

爾時，思益梵天問得忍諸菩薩言：「汝等豈不聽是經耶？」

諸菩薩言：「如我等聽，以不聽為聽。」

又問：「汝等云何知是法耶？」

答言：「以不知為知。」

又問：「汝等得何等故名為得忍？」

答言：「以一切法不可得故，我等名為得忍。」

思益言：「云何隨是法行？」

答言：「以不隨行故隨行。」

又問：「汝等於此法中明了通達耶？」

答言：「一切諸法皆明了通達，無彼我故。」

爾時，會中有天子名淨相，謂思益梵天：「若有但聞此經佛不與受記者，我當授其阿耨多羅三藐三菩提記。所以者何？此經不破因果、能生一切善法、能壞魔怨、離諸憎愛、能令眾生心得清淨、能令信者皆得歡喜、除諸瞋恨。斯經一切善人之所修行，斯經一切諸佛之所護念，斯經一切

⁴³⁶ 麗本：八百優婆塞、八百優婆夷；永樂北藏本及龍藏本：八百優婆塞

世間天、人、阿修羅所共守護，斯經決定至不退轉故，斯經不誑至道場故，斯經真實能令眾生得諸佛法，斯經能轉法輪，斯經能除疑悔，斯經能開聖道，斯經求解脫者所應善聽，斯經欲得陀羅尼者所應善持，斯經求福之人所應善說，斯經樂法之人所應善念。斯經能與快樂至於涅槃，斯經若魔外道有所得人不能斷，斯經應受供養人能隨其義，斯經能令利根者欣悅，斯經能令智慧者歡喜。斯經能與人慧，離諸見故；斯經能與人智，破愚癡故。斯經文辭次第善說，斯經究竟善隨義說，斯經多所利益說第一義，斯經愛樂法人之所貪惜，斯經有智之人所不能離，斯經施者之大藏，斯經熱惱⁴³⁷之涼⁴³⁸池，斯經能令慈者心等，斯經能令懈怠者精進，斯經能令妄念者得定，斯經能與愚者慧明。梵天，斯經一切諸佛之所貴重。」

淨相天子說是法時，三千大千世界皆大震⁴³⁹動。佛即讚言：「善哉！善哉！天子，如汝所說。」

爾時，思益梵天白佛言：「世尊！是天子曾於過去諸佛所聞是經耶？」

佛言：「是天子已於六十四億佛⁴⁴⁰所，得聞

⁴³⁷ 麗本：惱者；永樂北藏本及龍藏本：惱

⁴³⁸ 麗本：清涼；永樂北藏本及龍藏本：涼

⁴³⁹ 麗本：振；永樂北藏本及龍藏本：震

⁴⁴⁰ 麗本：諸佛；永樂北藏本及龍藏本：佛

是經。過四萬二千劫當得作佛，號寶莊嚴，國名多寶。於其中間有諸佛出，皆得供養亦聞是經。梵天，是諸比丘、比丘尼、優婆塞、優婆夷，諸天、龍、鬼神在此會中得法忍者，皆當得生多寶國土。」

爾時，淨相天子白佛言：「世尊！我不求菩提、不願菩提、不貪菩提、不樂菩提、不念⁴⁴¹不分別菩提，云何如來見授記耶？」

佛告天子：「如以草木莖節枝葉投於火中，而語之言：『汝等莫然！汝等莫然！』若以是語而不然者，無有是處。天子，菩薩亦如是，雖不喜樂貪著菩提，當知是人已為一切諸佛所記。所以者何？若菩薩不喜、不樂、不貪、不著、不得菩提，則於諸佛必得受阿耨多羅三藐三菩提記。」

爾時，會中有五百菩薩白佛言：「世尊！我等今不求菩提、不願菩提、不喜不樂⁴⁴²菩提、不貪著菩提、不思念菩提、不分別菩提。」作是語已，以佛神力即見上方八萬四千諸佛，授其阿耨多羅三藐三菩提記。

爾時，五百菩薩白佛言：「未曾有也！世尊！

⁴⁴¹ 麗本：不念菩提；永樂北藏本及龍藏本：不念

⁴⁴² 麗本：樂；永樂北藏本及龍藏本：不樂

如來所說甚善快哉！所謂菩薩不求、不願、不貪、不喜、不得菩提而諸佛授記。世尊！我等今見上方八萬四千諸佛，諸佛皆與我等授⁴⁴³阿耨多羅三藐三菩提記。」

如來神呪品第二十三⁴⁴⁴

爾時，文殊師利白佛言：「唯⁴⁴⁵願世尊護念是經⁴⁴⁶，於當來世後五百歲，廣宣流布此閻浮提，令得久住；又令大莊嚴善男子、善女人咸得聞之；設魔事種種起而能不隨魔，若魔民不得其便⁴⁴⁷；以受持是經故，終不退失阿耨多羅三藐三菩提。」

爾時，佛告文殊師利：「如是！如是！汝今善聽！欲令此經久住故，當為汝說召諸天、龍、夜叉、乾闥婆、鳩槃荼等呪術。若法師誦持此呪，則能致諸天、龍、夜叉、乾闥婆、阿修羅、迦樓羅、緊那羅、摩睺羅伽等，常隨護之。是法師若行道路、若失道時、若在聚落、若在空閑、若在僧坊⁴⁴⁸、若在宴室、若經行處、若在眾會，是諸神等常當隨侍衛護，益其樂說辯才。又復為作堅

⁴⁴³ 麗本：受；永樂北藏本及龍藏本：授

⁴⁴⁴ 麗本：諸天歎品第十七（丹如來神呪品第二十三）；永樂北藏本及龍藏本：

⁴⁴⁵ 麗本：惟；永樂北藏本及龍藏本：唯

⁴⁴⁶ 麗本：法；永樂北藏本及龍藏本：經

⁴⁴⁷ 麗本：亦不得便；永樂北藏本及龍藏本：不得其便

⁴⁴⁸ 麗本：房；永樂北藏本及龍藏本：坊

固憶念慧力因緣，無有怨賊得其便者，使是法師行、立、坐、臥一心安詳。文殊師利，何等為呪術章句？

「⁴⁴⁹鬱頭隸 頭頭隸 摩隸 遮隸 麁隸 梯隸 緹隸 彌隸 睺樓 睺樓 睺樓 堙婆隸 韋多隸 麴丘隸 阿那禰 伽帝 摩醯履 摩那徒 摩禰 婆睺乾地薩波樓帝 羅婆波⁴⁵⁰ 伽帝 辛頭隸 南無佛馱遮梨⁴⁵¹ 帝隸 南無達摩涅伽陀禰 南無僧伽和醯陀⁴⁵² 毗波⁴⁵³ 扇陀禰 薩婆波⁴⁵⁴ 禰麁帝隸 彌浮提底⁴⁵⁵ 薩遮涅提舍 梵嵐摩波舍 多⁴⁵⁶ 利師鞞波舍多 阿哆羅提訖⁴⁵⁷ 提薩婆浮多伽娑⁴⁵⁸ 呵⁴⁵⁹ 南無佛馱悉纏鬪曼哆邏⁴⁶⁰

「文殊師利，是為呪術章句。若菩薩摩訶薩欲行此經者，當誦持是呪術章句，應一心行，不調戲、不散亂，舉動進止悉令淨潔，不畜餘食；少欲知足，獨處遠離，不樂憤鬧，身心遠離；常

⁴⁴⁹ 麗本：鬱；永樂北藏本及龍藏本：鬱

⁴⁵⁰ 麗本：婆；永樂北藏本及龍藏本：波

⁴⁵¹ 麗本：黎；永樂北藏本及龍藏本：梨

⁴⁵² 麗本：和醯陀和醯陀；永樂北藏本及龍藏本：和醯陀

⁴⁵³ 麗本：婆；永樂北藏本及龍藏本：波

⁴⁵⁴ 麗本：波波；永樂北藏本及龍藏本：波

⁴⁵⁵ 麗本：履；永樂北藏本及龍藏本：底

⁴⁵⁶ 麗本：予；永樂北藏本及龍藏本：兮

⁴⁵⁷ 麗本：佗（佗，勅寫反）；永樂北藏本及龍藏本：訖

⁴⁵⁸ 麗本：羅；永樂北藏本及龍藏本：娑

⁴⁵⁹ 麗本：（呵，呼奈反）；永樂北藏本及龍藏本：（呼奈切）

⁴⁶⁰ 麗本：邏。一切眾生中慈說聖諦，梵天所讚歎！諸賢聖所讚歎！此中住召一切諸神，南無諸佛，當成就是呪術；永樂北藏本及龍藏本：邏

樂慈悲，以法喜樂；安住實語，不欺誑人；貴於坐禪，樂欲說法；行於正念，常離邪念；常樂頭陀細行之法，於得、不得無有憂喜；趣向涅槃，畏厭生死；等心憎愛，離別異相；不憚身命及一切物，無有貪惜；威儀成就，常樂持戒；忍辱調柔，惡言能忍；顏色和悅，無惡姿容；先意問訊，除去憍慢，同止⁴⁶¹歡樂。

「文殊師利，此法⁴⁶²師住如是法，誦是呪術，即於現世得十種力。何等為十？得念力，不忘失故；得慧力，善擇法故；得行力，隨經意故；得堅固力，行生死故；得慚愧力，護彼我故；得多聞力，具足慧故；得陀羅尼力，一切聞能持故；得樂說辯力，諸佛護念故；得深法力，具五通故；得無生忍力，速得具足薩婆若故。文殊師利，若法師能住是行，誦持呪術，現世得是十力。」

佛說是呪術力時，四天王驚怖毛豎，與無量鬼神眷屬圍遶，前詣佛所，頭面禮足，白佛言：「世尊！我是四天王，得須陀洹道，順佛教者。我等各當率諸親屬、營從、人民，衛護法師。若善男子、善女人護念法者，能持如是等經讀誦解

⁴⁶¹ 麗本：心；永樂北藏本及龍藏本：止

⁴⁶² 麗本：諸法；永樂北藏本及龍藏本：法

說，我等四天王常往衛護。是人所在之處，若城邑聚落、若空閑靜處、若在家、若出家，我等及眷屬常當隨侍供給，令心安隱，無有厭倦，亦使一切無能憍者。世尊！又是經所在之處面五十里，若天、天子，若龍、龍子，若夜叉、夜叉子，若鳩槃荼、鳩槃荼子等，不能得便。」

爾時，毗留⁴⁶³勒迦護世天王即說偈言：

我所有眷屬 親戚及人民
皆當共衛護 供養是法師

爾時，毗留⁴⁶⁴婆叉天王即說偈言：

我是法王子 從法而化生
求菩提佛子 我皆當供給

爾時，捷馱羅吒天王即說偈言：

若有諸法師 能持如是經
我常當衛護 周遍於十方

爾時，毗賒婆那天王即說偈言：

是人發道心 所應受供養
一切諸眾生 無能辦⁴⁶⁵之者

爾時，毗賒婆那天王子，名曰善寶，持七寶蓋，奉上如來，即說偈言：

⁴⁶³ 麗本：樓；永樂北藏本及龍藏本：留

⁴⁶⁴ 麗本：樓；永樂北藏本及龍藏本：留

⁴⁶⁵ 麗本：辦；永樂北藏本及龍藏本：辦；校勘：辦

世尊我今當 受持如是經
亦為他人說 我有如是心
世尊知我心 及先世所行
從初所發意 至誠求佛道
世尊無見頂 今奉此妙蓋
願我得如是 無見之頂相
我以愛敬心 瞻仰於世尊
願成清淨眼 得見彌勒佛
度智慧世尊 即時以偈答
汝於此命終 即生兜率⁴⁶⁶天
從兜率⁴⁶⁷下生 得見彌勒佛
二萬歲供養 爾乃行出家
既得出家已 淨修於梵行
賢劫中諸佛 一切悉得見
亦皆⁴⁶⁸供養之 於彼修梵行
過六十億劫 汝當得成佛
號名為寶蓋 國土甚嚴淨
唯有菩薩僧 為講說妙法
壽命盡一劫 若滅度已後
正法住半劫 利益諸眾生

⁴⁶⁶ 麗本：術；永樂北藏本及龍藏本：率

⁴⁶⁷ 麗本：術；永樂北藏本及龍藏本：率

⁴⁶⁸ 麗本：得；永樂北藏本及龍藏本：皆

爾時，釋提桓因與無數百千諸天圍遶，白佛言：「世尊！我今亦當衛護能持如是之⁴⁶⁹經諸法師等，供養供給。是經所在之處，若讀誦解說，我為聽受法故往詣其所；又當增益法師氣力，法句次第令不漏失。」

爾時，釋提桓因子名曰劬婆伽，持真珠蓋七寶莊嚴，奉上如來，即說偈言：

我常現了知	世尊之所行 ⁴⁷⁰
亦當如是行	求佛一切智
世尊於前世	無物不施與
我當隨此行	亦捨諸所有
我今法王前	受持如是經
當數為人說	以報如來恩
若愛念是經	是即與我同
我當供養之	為得菩提故
世尊聲聞人	不能守護法
於後恐怖世	我當護是經
世尊安慰我	又斷諸天疑
我今當久如	得佛如世尊
佛通達智慧	即時與授 ⁴⁷¹ 記

⁴⁶⁹ 麗本：比；永樂北藏本及龍藏本：之

⁴⁷⁰ 麗本：說；永樂北藏本及龍藏本：行

⁴⁷¹ 麗本：受；永樂北藏本及龍藏本：授

汝後當作佛 如我今無異
過去千萬⁴⁷²劫 又復過百劫⁴⁷³
爾乃得成佛 號曰為智王

爾時，娑婆世界主梵天王白佛言：「世尊！我捨禪定樂，往詣法師。若善男子、善女人，能⁴⁷⁴說是法者，所以者何？從如是等經出帝釋、梵王、諸豪尊等。世尊！我當供養是諸善男子，是諸善女人⁴⁷⁵應受一切世間天、人、阿修羅之所供養。」

爾時，妙梵天子⁴⁷⁶即說偈言：

比丘比丘尼 諸清信士女
其能受此⁴⁷⁷經 是世供養處
乃至有一人 能行是經者
我要當為人⁴⁷⁸ 演說如是經
敷眾妙華座 高至于梵天
於此座上坐 演說如是經
若於惡世中 所從聞此經
應發希有心 踊躍稱善哉

⁴⁷² 麗本：過於千億；永樂北藏本及龍藏本：過去千萬

⁴⁷³ 麗本：億；永樂北藏本及龍藏本：劫

⁴⁷⁴ 麗本：若；永樂北藏本及龍藏本：能

⁴⁷⁵ 麗本：男子；永樂北藏本及龍藏本：女人

⁴⁷⁶ 麗本：王；永樂北藏本及龍藏本：子

⁴⁷⁷ 麗本：是；永樂北藏本及龍藏本：此

⁴⁷⁸ 麗本：之；永樂北藏本及龍藏本：人

若無量世界 大火悉充滿
要當從中過 往聽如是經
能開佛道經 若欲得聞者
積寶如須彌 應盡供是人

囑累品第二十四⁴⁷⁹

爾時，世尊現神通力，令魔波旬及其軍眾來詣佛所作是言：「世尊！我與眷屬今於佛前立此誓願：『是經所流布處，若說法者及聽法者，并彼國土不起魔事，亦當擁護是經！』」

爾時，世尊放金色光照此世界，告文殊師利言：「如來今護念是經，利益諸法師故。是經在閻浮提，隨其歲數佛法不滅。」

爾時，會中眾生以一切華、一切香、一切末香而散佛上，作是言：「世尊！願使是經久住閻浮提，廣宣流布。」

於是，佛告阿難：「汝受持是經不？」

阿難言：「唯然，受持！」

「阿難，我今以是經囑累於汝，受持 讀誦、為人廣說。」

阿難白佛言：「世尊！若人受持是經，讀誦

⁴⁷⁹ 麗本：囑累品第十八（丹第二十四）；永樂北藏本及龍藏本：囑累品第二十四

解說，得幾所功德？」

佛告阿難：「隨是經所有文字、章句之數，盡壽以一切樂具供養爾所諸佛及僧；若人乃至供養是經⁴⁸⁰，恭敬、尊重、讚歎，其福為勝。是人現世得十⁴⁸¹德之藏。何等為十⁴⁸²？見佛藏，得天眼故；聽法藏，得天耳故；見僧藏，得不退轉菩薩僧故；無盡財藏，得寶手故；色身藏，具三十二相故；眷屬藏，得不可壞眷屬故；所未聞法藏，得陀羅尼故；憶念藏，得樂說辯故；無所畏藏，破壞一切外道論故；福德藏，利益眾生故；智慧藏，得一切佛法故。」

佛說是經時，七十二那由他眾生得無生法忍，無量眾生發阿耨多羅三藐三菩提心，無數眾生不受諸法，漏盡，心得解脫。

爾時，阿難即從坐起，偏袒右肩，頭面禮足⁴⁸³，白佛言：「世尊！當何名此經？云何奉持？」

佛告阿難：「此經名為攝一切法，亦名莊嚴諸佛法，又名思益梵天所問，又名文殊師利論議，當奉持之。」

佛說是經已，文殊師利法王子及思益梵天、

⁴⁸⁰ 麗本：經卷；永樂北藏本及龍藏本：經

⁴⁸¹ 麗本：十一功；永樂北藏本及龍藏本：十

⁴⁸² 麗本：十一；永樂北藏本及龍藏本：十

⁴⁸³ 麗本：佛足；永樂北藏本及龍藏本：足

等行菩薩、長老摩訶迦葉、慧命阿難、及諸天眾、
一切世人，受持佛語，皆大歡喜。

思益梵天所問經卷第四

● 結誦儀

補闕真言

(三徧)

南無喝囉怛那. 哆囉夜耶. 佉囉佉囉. 俱住俱住. 摩囉摩囉. 虎囉. 吽. 賀賀. 蘇怛拏. 吽. 潑抹拏. 娑婆訶.

補闕圓滿真言

(三徧)

唵. 呼嚧呼嚧. 社曳穆契. 莎訶

普回向真言

(三徧)

唵^一 娑摩囉^二 娑摩囉^三 彌摩曩^四 薩哈^{呼馬切} 囉^五 摩訶
咱^{爻上聲} 哈囉吽^六

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無文殊師利菩薩摩訶薩 (合掌三稱)

南無護法諸天菩薩 (合掌三稱)

禮佛發願文

(一徧)

歸命十方調御師 演揚清淨微妙法
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤，仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉痾；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一徧)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

十方三世一切佛。一切菩薩摩訶薩。摩訶般若波羅蜜。

三皈依

(一徧)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

